

891. 522-93

7-2

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԱՄՍԱԳՐԻ

№ 6.

Ռ. Պ Ա Տ Կ Ա Ն Ե Ա Ն

Զ Ա Խ Ո Ւ

Ն. ՆԱԽԻՋԵՆԱՆԻ ԲԱՐԲԱՌԻՑ ՓՈԽԱԳՐԵՑ

ՍՏ. ԼԻՍԻՑԵԱՆ

Թ Ի Ֆ Լ Ի Ս

ԷԼԵԹՐԱԶԱՐԴ ՏՊԱՐԱՆ ՕՐ. Ն. ԱՂԱՆԱՆՅՈՒ ՊՈԼԻՑ. 7.
1909

383

30 MAY 1911

29 ար

ՀՐԱՏԱՐԱԿՈՒԹԻՒՆ, ՀԱՍՈՒՆՈՒՄ, ԱՄՍԱԳՐԻ

№ 6.

Բ. ՊԱՏԿԱՆԵԱՆ

ԶԱԽՈՒ

3304

Ն. ՆԱԽԻՋԵԻԱՆԻ ԲԱՐԲԱՌԻՑ ՓՈԽԱԴՐԵՑ

ՍՏ. ԼԻՍԻՑԵԱՆ

Թ Ի Ֆ Լ Ի Ս

ԷԼԷՄԵՆՏԱՐԻ ՏՊԱՐԱՆ ՕՐ. Ն. ԱՂԱՆԵԱՆՑԻ. ՊՈԼԻՑ. 7.

1909

18 JUL 2013

12088

ՉԱԽՈՒ

Ջրկիր Մարտիրոսի պատմածը

Գարունը դեռ հասած չէր, բայց էն տարին շոքը էնպէս վաղ էր կոխել, որ փետրւարի տասնհինգին— քսանին արդէն դալար-արօտը, բանջարը գետնից մէկ թիզ վեր էր ելել։ Մարտի սկզբին արդէն տարմերը եկել էին հեռու տեղերից և տանիքների կրամիտների մէջ սկսել էին իրենց բունը շինելու, կռունկները, վայրենի սագերը երամ-երամ, կռկռալով Դոն գետի կողմից դէպի Ռուսաստան էին թռչում գնում. էլ վախ չըկար յանկարծակի ցրտերից։ Մի քանի օր էլի անցաւ, Արարիչ Աստուած, էնպիսի շոքեր արաւ, որ բոլորովին յունիսի տօթ ու տապն էր... չորութիւնից գետինը սկսեց ճաքճքել, ձիւնի թողած խոնաւութիւնը վաղուց անցել անհետացել էր. հողագործները Աստուած Աստուած էին կանչում. եթէ էլի մի քանի օր էտպէս շարունակւելու լինէր, ամբողջ ցորենը պիտի թառամէր, փչանար։

Էտ ժամանակները ինչպէս կըլինի որ ձիս ոտքը վնասել էր, ոչ միայն բեռ քաշել, ոտքի

վրա կանգնելու ուժ չունէր անասունը: Բայց այգիս անպատճառ ջրել էր պէտք, թէ չէ էն-բան տարւայ աշխատանքս մէկ շաբաթւայ մէջ պիտի գնար: Ուզէի չուզէի մէկ ջրկիր պիտի բռնէի, պէտք է գետից—նկատւած է որ աղբիւ-րի ջուրը պարտէզին օգուտ չի տալիս—տակառ տակառ կրել ու դոյլերով ծառերի տակը լցնել տայի: Էնպէս էլ արի, բանւորիս յատկապէս ջրկիր Մարտիրոսի ետևից զրկեցի, որ վաղա-նից սկսի գետից ջուր կրել:

Միւս օրը բազար գնացի և մինչև կէսօր, ինչպէս սովորութիւնս էր, խանութումս մնացի: Երբ կէսօրւայ ճաշին տուն վերադարձայ, Մար-տիրոսը երկու ձեռքին երկու դոյլ (վեդրօ) ան-դադար տակառից ջուր էր քաշում և պարտէզիս տակառիկներն էր լցնում, բանւորս էլ—Խրիմից նոր ծառեր էի ապսպրել—տեղ-տեղ փոսեր էր փորում: Հացից դեռ նոր էի վեր կացել, մեր Մարտիրոսը էլի մէկ տակառ էր բերել գետից և պարտէզս կրելու վրա էր, որ ես էլ էնտեղ գնացի՝ նայեմ, բանւորս ի՞նչ բանի վրա է:

Մի հին ծիրանի ծառս էն ձմեռ ցուրտը խփել չորացրել էր, բանւորիս պատէր էի տւել որ արմատով հանի և նորից այնտեղ մի փոս փորի, որ նոր ծառ տնկեմ: Երբ պարտէզս մը-տայ, հէնց էտ փոսը փորելու վրա էր բան-ւորս: Գնացի կանգնեցի էտ փոսի ափին և թմ-

րածի պէս մնացի. շատ կեցայ էտպէս, քիչ կե-ցայ, չը գիտեմ. միայն բաւականի ժամանակ մնացած պիտի լինեմ, քանի որ Մարտիրոսը այդ նոր բերած տակառն էլ արդէն դատարկել էր և սուս-փուս ետևս կանգնել էր, միտքը ե-րևի փող ուզէնալն էր, բայց երեսը չէր բռնում ինձ բան ասելու, ձեռքը խաչ կապած կանգնել էր խեղճ մարդը: Մէկ էլ ետ դառնամ, ի՞նչ տեսնեմ. էտ մեր Մարտիրոսը սառած քար կը-տրած կանգնել է, աչքը փոսից չի հեռացնում, ուղիղ մէջն է նայում, ու աչքից առատ-առատ արտասուք է վազում ու գետնին է թափւում...

«Հաժէ (այ տղայ), ի՞նչ եղաւ քեզ» հարց-նում եմ: Բան չի ասում:

«Հաժէ Մարտիրոս, — ասում եմ,—գժւել ես, ի՞նչ է, էտ հասակի մարդ լաց կը լինի՞ որ, չէ՞ս ամաչում, երեսիդ գոյնին մէկ նայիր, բո-լորովին մեռել ես ո՛ւ»:

Մարտիրոսը էլի սուս կանգնել է, փոսի մէջն է նայում: Էտ ժամանակ բանւորս հողը փոսից հանեց ու մի կողմ շալտեց. հողի հետ մի փթած փայտի կամ ոսկորի պէս բան էլ կար, որն որ գլորեց հէնց ոտքիս հասաւ: Յանկարծ մեր Մարտիրոսը խելագարի պէս վրա ընկաւ էտ փթած ոսկորին, շտապով գետնից վերցեց ու դիւահարի ձայնով կցեց կանչելու.

«Շանկա, եանկա (տանտիկին, խանութ),

վարպետ, վարպետ, Մկրտիչ վարպետ, ահա ձեր կորած չախուն, ահա էն չախուն... գտնւեց... գտնւեց... Մեռնեմ անունիդ, սուրբ Մինաս, վերջը վերջը դու լոյս հանեցիր իմ կորուստը»:

Կանգնած տեղս սառած ֆաթի, էսպիսի զարմանալի բանի դեռ իսկի հսնդիպած չէի, աչքովս չը տեսնէի ու ուրիշից լսէի—բոլորովին չէի հաւատայ, որ Մարտիրոսի պէս ծանր բնութեով մարդը—տասնուհինգ քսան տարուց ի վեր նրան ճանաչում էի—էտպէս խենթ-մենթ դուրս տայ: Ի՞նչ մեղքս պահեմ, խեղճ մարդուն խելագարւած կամ բռնւած կարծեցի, բայց վերջը, երբ բանը տեղով իմացայ, մտքիս մէջ մեղայի եկայ և էտ կարծիքս փոխեցի:

Մարդուն հազիւ-հազ խելքի բերի, թէ չէ խեղճը հարբածի պէս բան եղել էր: Էտ փթած ոսկորը ձեռքը ամուր բռնած, հայ-հայ պատերն է բարձրանում, «եանկա» է կանչում, «վարպետ» է կանչում, մէկ էլ լռում է, մինչ դեռ Մկրտիչ վարպետի մեռնելը քսան տարուց աւելի է, նրա կնոջ մեռնելն էլ քառասուն տարուց պակաս չի լինի:

Էս տունս, որտեղ այժմ ես կենում եմ, ժամանակով տիրացու Մկրտչինն էր: Էտ տիրացու Մկրտիչը սրանից յիսուն տարի առաջ էս տան մէջ կտրդացնելիս է եղել: Ինչ որ էլ լինի, մէկ խօսքով, բանի եղելութիւնը էս էր:

Բայց դու արի ու հիմա հարցրո՛ւ թէ՛ ինչո՛ւ ջրկիր Մարտիրոսը փոսի առջև սառած ֆաթել էր ու լաց էր լինում, ինչո՛ւ փթած ոսկորը տեսաւ թէ չէ, գոթի նման գետնից վերցրեց ու սկսեց «եանկա» ու «վարպետ» պըտել: Էտ էլ ջրկիր Մարտիրոսը իր բերանով թող պատմի:

«Սրանից յիսուն ու հինգ տարի առաջ, էս քո կեցած տան մէջ կենում էր Մկրտիչ անունով մի տիրացու և քանի որ էս տիրացուն իր ընկերակիցների մէջ ամենից գիտունն էր յիշուում—այսինքն՝ ասել եմ ուզում թէ՛ դա քիչ-միչ գրել-կարդալ գիտէր, միւսները էն էլ չը գիտէին—իր համար պարագմունք էր արել աշակերտներ սովորեցնելը: Ես էլ էտ ժամանակները կը լինէի գուցէ տասը տարեկան: Մէկ անգամ պապաս (հայրս) թեիցս բռնեց ու տարաւ տիրացու Մկրտիչի մօտ աշակերտ տւեց:

Պապաս-Աստուած հոգին ողորմի—չար բնութեով մարդ էր: Ինքը որովհետեւ մինչև պսակւելու օրը հօր փայտից դողացել էր, էնպէս էլ ինձ էր ուզում խիստ պահել: Պարծանք չը լինի ասածս, իմ բնութեան աւելի մամայիս (մօրս) բնութեին էր նման—սուս-ուս-փուս, վիզս ճուղ: Բայց էտ չօգնեց. երբ որ պապաս առաջին անգամ տարաւ ինձ Մկրտիչ վարպետին տւաւ, նախ և առաջ մէկ լաւ ականջս ոլորեց, յետոյ մէկ ապտակ էլ շրխկացրեց երեսին և ա-

սաւ. «Նայիր, վարպետ, որդուս բերել եմ, կաշին քեզ, ոսկորը ինձ. ինչ կուզես արա, ուզում ես խեղդի, ուզում ես քերթի, ուզում ես մորթի, էնքան է որ յիմար եմ տալիս, խելօք պիտի առնեմ»:

Վարպետ ասած բանդ մեր ժամանակները, ինչ ասեմ քեզ, թէ որ ասեմ գայլ-գաղանից էլ սատանական էր, արդեօք դորթ ասած չեմ լինի: Էտ հիմա է որ երեխին վախեցնել որ ուզում են, «ահա արջը եկաւ, ահա վիշապը եկաւ, ահա մըմըռասը եկաւ» են ասում, որ երեխան մի քիչ սրտի մէջ վախ ունենայ ու իր չարութիւնից ձեռք վերցնի. մեր ժամանակները «վարպետի» անունը որ տային, լեղինքս կը պատռէր, փախչող-փախչողի կը լինէինք. որս դուրը կը մանէր, որս ծալքի մէջ կուշ կը գար, ժամերով կը կենար, ձայն-ծպտուն չէր հանի—էտպէս սասան-սասանի կը գայինք:

Երբ ես աւելի փոքր երեխայ էի, վարպետի անունը լսելիս մէկ ձիգ հասակով, երեսը չորչոր, սուր մօրութեամբ, շալէ կապայով, մէկ ձեռքին տէր-ողորմեան, մէկէլ ձեռքին կարմիր ձիպոտ—էտպիսի մի հրէշ էի երեւակայում, երբ որ պապաս ձեռքիցս բռնեց, տարաւ վարպետի տուն և ինձ յանձնեց նրան—իր ձեռքով ականջս քաշածը ու ապտակ տւածը էն ոչինչ—մըտքիս մէջ էնպէս կարծեցի, որ ողջ-ողջ ինձ պա-

տանքեցին և սե հողը դրին... Որբի պէս վիզս ճուկ կանգնել եմ, իսկը այն կապած-կապկապած մատաղի դառը, որ մինչև ժամկոչի դանակ սրելը՝ սուս-փուս պառկել է նրա ոտքի տակ...

Մկրտիչ վարպետը ծալապատակ նստած էր մէկ քառակուսի պատիկ մինդարի վրա—մեր ժամանակները հիմիկլապէս վարպետի տանը աթոռներ, նստարաններ, սեղաններ չը կար—երեսուն հինգ քառասուն աշակերտներ էլ կողքէ կողք, մէջքները պատերին արած, իրենց մինդարների վրա նստած, ձեռներին մի մի պնակիտ կամ քերական պնակիտ—տախտակի վրա կպցրած տպագիր այբուբեն քերականայբենարան գիրք: Դասերն էին սովորում. այն սասանական «ձիպոտը» վարպետի առջևն էր: Էսօրւայ պէս միտքս է. երկայնքը հինգ շաւրէք կը լինէր, բութ-մատիս հաստութիւնը, ծայրին ծակ ունէր, ծակի մէջն էլ թել էր անց կացրած, որ պատից կախւի: Աշակերտներից մի երկուսին ճանաչում էի, բայց շատերին առաջին անգամս էր տեսածս:

«Ձէ, ինչու, ասաւ Մկրտիչ վարպետը. գուցէ որդիդ ուշագիր է լինում, դասը լաւ է սովորում, գուցէ խեղճը իսկի չարութիւնն չի անում: Էն ծեծը որ կայ, չարերի ու ծոյլերի համար է... Դու իսկի լսած չեմ. Տէր մեր Յիսուս Բրիստոս ասէ (երեսը խաչ հանեց, պա-

պաս էլ ետևիցս), օրհնեալ է փայտն (ճիւղոտը վերցրեց և ցոյց տաւ աշակերտներին), որով լինի արդարութիւն... Դէհ, էտ էլ էտպէս...

—Չէ,—ասաւ պապաս,—իսկի էտպիսի բան կը լինի... Էն աւետարանի խօսքը կայ ու կայ, բայց երեխան որ առանց ծեծի մեծանայ, մէկ օր ինքը—հեռու տանից տեղից — հօրն ու մօր վրա ձեռք կը բարձրացնի: Աշխարհս էտպէս եկել է, էտպէս էլ պիտի գնայ: Հիմա դու, ինչ է՝ վարպետ ես, մեր հնուց կարգերը ոտքի տակ պիտի տաս, ի՞նչ է... Իհարկէ, կարգդ Աստուծ հաստատ պահի... բայց երբ լսել եմ թէ որդուս երես ես տալիս, վախով չես պահում, երախտիքդ խնայում ես նրանից, սիրտդ թող չը ցաւի, թքել եմ ես քո գոված իմաստութիւնիդ վրա... Ի՞նչ է, դու կարծում ես թէ ես որդուս տիրացու կամ վարդապետ եմ ուզում անել... Էս չէս ուզում,—ասաւ պապաս և բռն ժամանակը խցկեց կողքի երկու մատների մէջտեղ...—Տէրտէր, վարդապետ, տիրացու, ժամկոչ էտ ամենը մէկ տեսակի բաներ են:

Նայեաց սիրով հայրըդ գթած

Քաղցած ենք, տուր՝ մէկ կտոր հաց...

Իհարկէ, գրոց լեզուն գիտես, բերական ճարտասանութիւն, Աստուածաշունչ — ամենը կարդացել ես, բայց ասելուցս ինձնից քեզ խրատ չը լինի... «Էտ Աստուծ-պապան Ա-

դամ Եւային որ ստեղծեց—թէ որ գրել կարդալը լաւ բան էր, ինչո՞ւ խելոյն առջնները մէկ քերական չը դրաւ, չասաւ թէ էս լաւ բան է, սովորեցէք: Ի՞նչպէս է որ ողորմած Աստուծ յատուկ իր ձեռքով ստեղծած աղամորդուն լաւութիւն չէր կամենալ... Հը, ի՞նչպէս ես, դորթ է ասածս, թէ չէ... Բայց ես քեզ դրանից է խելօք, խելքի պառկելու բան ասեմ: Էտ գրել-կարդալ ասածդ ուրիշ հաշիւ ունի... Էտ պատիկ երեխան որ կայ, կատարեալ մի վայրենի գազան է. ինչպէս որ գազանին դնչկալով, շղթայով կը զսպեն, պառը կը դարձնեն, հէնց էնպէս երեխաներին էլ գրել կարդալով կը զսպեն, հոգիները ջանից կը հանեն, աչքերի լոյսը կը մարեն, կը մաշեն. ահա դրանից յետոյ երեխան օրինաւոր մարդ կը դառնայ, վիզը կը ծռի, սըլտի մէջ ահ կուենեայ, մեծի առջև ձեռքը խաչկապած կը կանգնի, մարդու սիրտ ցաւեցնելու տեղ՝ սիրտ շահելու կաշխատի, հարուստի ու իշխանի պատիւը կը ճանաչի... Ապա, ջանս, դու գիր կարթացող ես, իմաստուն ես, բայց քեզնից տեղով գիտեմ գրել-կարդալու օգուտը:

Ասաւ ու տեղից ելաւ:

—Էհ, ինչպէս որ ասի, էնպէս էլ կանես. վարձդ էլ ինչ որ է՝ չորս ամիսը մէկ կառնես: Վարպետի վարձ տարեկան պիտի տայինք

երկու ուրիշ ասիականացի, յիսուն հաւ ձու, մէկ փուլթ ալիւր, մէկ հաւ և մէկ բաղ:

Պապան գնաց, ես մնացի: Վարպետս դարձաւ ինձ և ասաւ. «հաճէ (ձօ) պստիկ, անոնդ ի՞նչ է»—Մարտիրոս է, ասի. ձայնս փորիցս էր դուրս գալիս: «Հաճէ Մարտիրոս, ասաւ, էս երկայն ճիւղաւ տեսնում ես», յետոյ մինդարի տակից հանեց մի փալախա, «էս ֆալախան էլ տեսնում ես»: Ողջ մարմինս փուշ-փուշ եղաւ, երբոր կարմիր ճիւղտն և հաստ ֆալախան տեսայ, կարգին ջերմով բռնաւծի պէս ամբողջ մարմնով դողացի: «Հը, վախեցա՞ր, ասաւ վարպետս, շտէ լաւ իմացիր որ չարութիւն արել ես թէ չէ, տապանիդ կաշին կը պոկեմ», ասաւ ու ճիւղտը ժը՛վ ժը՛վ ժը՛վ թափ տւաւ:

—Հետդ քերական բերե՛լ ես, հաբցրեց յետոյ:

—Հա, ասի ու քիսայիցս հանեցի մի հաստ-լի՛կ գիրք կարմիր կազմով ու պղնձէ կոճակներով:

—Էս ի՞նչ էլ, ասաւ վարպետը, բեր, մէկ տեսնեմ.

—Պապաս տւաւ, ասի ու գիրքը իրան տւի:

—Հաճէ ապուշ, սա քերականն է որ ձեռքդ տւել են: Սա Նարեկ է ո՛ւ:

—Պապաս տւաւ, ասի նորից, ուրիշ բան չը գտայ ասելու: Ի՞նչ նրա քերականը գիտէի, ի՞նչ Նարեկը. էն բոլորին բացի ճիւղտից ու ֆալա-

խայից ուրիշ բան չէի տեսնում աչքիս առջև: Ինձ էնպէս էր երևում որ տան չորս պատերից ամեն տեղ ճիւղտներ ու ֆալախաներ են կախած, տղաների ձեռները մէկ մէկ ճիւղտ էին երևում ինձ, ոտներն էլ մէկ մէկ ֆալախա: Առաջին անգամն էր վարպետի մօտ գնալս, Աստուած կը սիրես, ես ի՞նչ գիտէի՝ ինչ ասել է կարգալ, գրել, քերական, Նարեկ:

—Անշնորհք, ասաւ Մկրտիչ վարպետը, տղան որ վարպետի մօտ է գալիս— էն գլխից ձեռքը քերական կը տան, քերականը որ վերջացնի, պստիկ սաղմոս կը տան, էն էլ որ վերջացնի՝ մեծ սաղմոսը կը տան. նրանից յետոյ ժամագիրք կը տան, յետոյ աւետարան կը տան, էն վերջը Նարեկ կը տան, էն էլ որ աւարտի, ասել է, օրինաւոր կարգալը վերջացրած կը լինի, վարպետից էլ դուրս կերթայ: Բայց ապուշի գլուխ, արի նայենք, այսքան բան դու ե՛րբ պիտի աւարտես, որ Նարեկը կարողանաս կարդաս... Նայիր էտ տղաներին. ո՞րը չորս տարի է մօտս, որը երեք տարի է, մէջերը էնպէսներն էլ կան, որ հինգ տարի են սովորում, բայց մէկի ձեռքը Նարեկ տեսնում ես... Ձէ, տղաս, գիր կարգալը էտ տեսակ հեշտ բան չէ, էս ներկարարին կաթսան չէ որ տղային մէջը դցես հանես ու հօր ձեռքը տաս «ահա, որդիդ պատրաստ է»: Էյ որդիս, որդիս, դեռ շատ պիտի աշխատես, ձեռքիդ ամիս

ու ոտքիդ տապանը դեռ շատ պիտի բշտի ու քանի անգամ կաշին պիտի փոխի, մինչև որ Նարեկին հասնես...

Նա գլուխս կախած լսում էի, ասածից էսքանը հասկացայ որ մկան պէս թափարդ եմ ընկել, մէջիցը ազատւելու ճար չունեմ, մէկ կողմից խիստ հայրս, միւս կողմից դեռ պէս վարպետս, էս կողմը կրակ, էն կողմը բոց. որտեղ որ դառնայի՝ դժոխք էր:

Բայց դու Ասածու ողորմութիւնը տես—մեռնեմ Նրա սուրբ անունին: Վարպետս պատից առաւ պնակիտը, հինգ հատ գիր ցոյց տրւաւ՝ այբ, բէն, գիմ, դա, եչ, «մինչև կէսօր էսքանը կը սովորես. դասդ չը տւած տեղիցդ վեր չը կենաս ու սուրն գնալ չը համարձակես»:

Կարծեմ մինչև կէսօր ժամ կամ ժամուկէս էր մնում, ասել է՝ բաւականին ժամանակ կար: Սկսեցի սերտել. էնպէս սիրով կարդացի, էնպէս սիրով սովորեցի որ—սուտ չասեմ—բառորդ ժամայ մէջ էն դասը սերտեցի: Գնացի կանգնեցի վարպետիս առջև, «դասս գիտեմ» ասի: Տեսնեմ, ասաւ: Ժըվըռ ժըվըռ գրի պէս ասի: —Այ ապրիս, ասաւ. հինգ հատ գիր էլի որ տամ, ասաւ, կարո՞ղ ես սովորել: «Տեսնեմ, դուցէ կարողանամ» ասի: —Մէկ տեսնեմ շնորհքդ, ասաւ. զան. էն, ըթ'ը, թօն ու ժէն տւաւ: Կը հաւատանս, բառորդ ժամ անցած չանցած, էն էլ

սերտեցի ու գնացի սոխակի պէս կարդացի վարպետիս առջև: «Շէն կենաս», ասաւ վարպետս. «էտ լաւ է, շատ ապրես, Մարտիրոս, անֆէրիմ քեզ: Էլի հինգ գիր տամ, էն էլ կարո՞ղ ես սերտել»: Նա սիրտ առայ—Ինձ համար էն ի՞նչ բան է որ, ասի. թէկուզ տասն ու հինգն էլ տուր, ասի, արդէն յանդգնացած. «Ձէ, տասն հինգը շատ է. մէկ անգամից կը շնչւես. տասը հատն էլ բաւական է. անա քեզ՝ ինի, լիւն, խէ, ծա, կէն, հօ, ձա, դատ, ճէ, մէն, յի. հերիք է էսքանը»:

Գնացի տեղս նստեցի, բայց սիրտս սեղմւեց, մտքիս մէջ կասկած ընկաւ՝ իսկ եթէ՞ չը կարողանամ: Աստուած հոգին լուսաւորէ, մամաս ինձ մէկ բան սովորեցրել էր՝ «երբ որ մէկ բանի ետևից ես ու նրան հասնել ես ուզում—ասել էր մամաս—մտքիդ մէջ սուրբ Սարգսին կանչիր. «սուրբ Սարգիս. դուն նեղացածիս հասնես» ու երեք անգամ երեսդ խաչ հանիր»: Հիմա ես մտքիս մէջ էտ աղօթքը ասի, բայց երեսս խաչ հանել թէ ամաչում էի և թէ վախենում: Պատիկ էի, բայց էլի ճարտար էի. կամացուկ ձեռքս վարտիկիս գրպանը կոխեցի և էնտեղ խաչ հանեցի ու միամտւած սկսեցի երբորդ դասըս սերտել: Հինգ անգամ իրար ետևից կարդացել էի կարդացած չէի—դու էս հրաշքին մտիկ արա—էտ էլ ջրի պէս սովորեցի:


Հիմա բանը էնտեղն է հասել, որ ինքն ինձ
չեմ հաւատում. մտքիս մէջ ասում եմ. «էս
երազ հօ չէ, քնիս մէջը հօ չեմ»: Ձեռքս ծոծ-
րակա եմ տանում, գլուխս քորել եմ ուղղում,
իբր թէ օջիւններն են կծում—մինչդեռ երէկ
մամաս ինձ տաշտը նստացրել է, լաւ լւացել է,
գլուխս էլ սանրով էնքան քերթել է, բոլոր
օջիւնները կոտորել է որ օջիւ չէ, մէկ անէծք էլ
մնացած չէ—բայց միտքս էն է որ եղունգովս
ծոծրակս կամթեմ, որ տեղով իմանում երազ
է էս թէ իրականութիւն: Ծոծրակս կամթում
եմ. եղբայր, ցաւ են դգում: Ա, կասեմ մտքիս
մէջ, երազ չէ եղել: Ես էլ էտ էի ուղղում...
Վերջապէս կերթամ վարպետիս առջև ցցած կը
կանգնեմ, «դասս գիտեմ» կասեմ ու ուղղակի
մարդու աչքի մէջ կը նայեմ: Վարպետս տե-
ղից վեր է թռչում, «էս ինչպէս շուտով սովո-
րեցիր» ասում է: Ես սուս կանգնել եմ, մըտ-
քիս մէջ խնդում եմ վրան: Մի քիչ կենալուց
յետոյ, «չի լինի թէ, ասում է, էն գլխից դի-
տէիր այբուբենը ու հիմա գիտեցած դասերդ
եկել ես նորից տալիս», ասում է:—Ձէ, Աս-
տուած վկայ, ասում եմ, էսօր առաջին անգամ
է պնակիտը ձեռքս, ասում եմ: «Ղ.Որթ», ասում է
մարդը:—Հա, ասում եմ: Մարդը զարմանում է:

Ախար դորթ էլ զարմանալու բան էր. քա-
ղաքի հիմք գցելուց ի վեր էսպիսի բան տես-



նւած էլ չէր, լսած էլ չէր.—Որ էնպէս է, ա-
րի նայեմ, դասդ ասա: Ձուրի պէս դասս ասի:

—Սյոժմ թարս կարդա. մէկ տեսներնը, ա-
սում է, այսինքն յի, մեն, ձէ, դաթ, ինչ որ է:
Թարսից էլ կարդում եմ. մարդը էլ աւելի զար-
մանում է:—Միւս դասերդ էլ միտդ են, մոռա-
ցել չես, ասում է: «Ձէ, մոռացած չեմ, ասում
եմ:—Ասա, ասում է: Էն էլ առանց շունչ քա-
շելու դըվըռ դըվըռ ասում եմ:—Թարս կարդա,
ասում է: Թարս էլ կարդում եմ: Մարդու ե-
րեսը մէկ տեսակ կը լինի: Ծոցից ժամացոյցը
հանում է, նայում է—մինչև կէսօր էլի ուղիղ
մէկ ժամ է մնում:—Մինչև դպրոց արձակելը
պնակիտդ վերջացնել կարող ես, հարցնում է:
«Տեսնեմ» գուցէ կը կարողանամ», ասում եմ:
—Է՛, գնա սովորիր, ասում է, ու սկսում է
միւսների դասերը նայել: Ծիպոտն ու ֆալախան
տեղերից շարժում են ու իրենց շնորքը ցոյց
են տալիս: Տղաների ձիւ ու աղաղակների, լաց ու
գոչումի մէջ ես մնացած բոլոր գրերն էլ սովո-
րում վերջացնում եմ, այբ սէ—աս, վէ՛վ այբ—
վա, ասվա, ծա ինի մեն—ծիմ, անւածիմ, էտ է
կապում եմ, բոլորովին պատրաստ գնում նորից
վարպետիս առջև կանգնում, էն էլ պատասխանում
եմ: Մարդու լեզուն պապանձում է, խօսք չի
կարողանում ասելու, և մենակ էս է ասում:
«Մարտիրոս, մէկօր դու մարդ պիտի դառնաս»:



Բայց պապաս մէկ անգամից չը հաւատաց.
«սուտ է առում շան ցգնածը» ասաւ, երբոր
մամաս նրան էլ պատմեց իմ հրաշքները՝ «այբու-
բենը ծայրէծայր վերջացնելու համար քիչ-քիչ
երեք ամիս պէտք է, կն էլ օուր մտքով տղի
համար: Էտ մենք արհեստաւոր ենք՝ ասենք,
գրի երեսը տեսած չենք, ի՛նչ. մինք էլ խօ ե-
րեխայ ժամանակներս վարպետի մօտ գնացել
ենք: Մէկ երկու անգամ Ֆալախայի համը չա-
ռած՝ լսած բան է, որ տղան այբբենը վերջա-
ցնի: Պարծենում է, շտէ, բօլ-բօլ սուտեր է

Քերականը որ ձեռք առայ, ախորժակս բու-
լորովին կորաւ. առաւօտւանից բռն կերած չէի,
բայց սեղանին բերանս բան դնել չը կարողա-
ցայ, խելքս միտքս վարպետիս տանն էր, ֆա-
լախայի, ճիպոտի վախը սրտիցս դուրս էր
կլել:

Վարժատունն որ գնացի, դեռ տղաները հա-
ւաքւած չէին, վարպետս էլ պարտէզ դուրս էր
եկել—ահա էն տեղերը, ասաւ ու մատով ցոյց
տուաւ զինչիրմէիս ծառի տեղը—բօլթա կը տար,
ինձ որ տեսաւ՝ «հածէ, ինչո՞ւ էտպէս շուտ ետ
դարձար, հարցրեց, կերակուր չը կերար, ի՞նչ»։—
Չէ, կերայ, ասի։ «Ե՛յ, ժիւ քիչ հանգստանայիր
դեռ» ասաց։—Հանգստացայ, ասի։—«Լաւ, ասաւ,
ուզում ես՝ էստեղ խաղայ, թէ չես ուզում» գնա
սենեակը նստիր»։ Քերականս ցոյց տւի իրան,
«ահա պապաս առաւ», ասի։—«Լաւ, ասաց, տը-
ղաները որ գան, կը սովորես»։—Չէ, ես հիմա
եմ ուզում սովորել։ Դաս տուր ինձ ասի։
«Ի՛, առաւ, ի՞նչ էտքան շտապով։ Չը լինի շու-
տով սովորել, խալֆա լինել ես ուզում, որ ինձ-
պէս երեխաներ կարգացնես», ասաւ հանաք ա-
նելով։ Ես բան չասի, սուս վեցայ, որովհետեւ
իսկի մտքովս անցած չէր վարժապետ կամ
տիրացու կամ տէրտէր լինել։ Էնքան ու-
զում էի՝ մամայիս, հարևանների առջև պար-
ծենամ թէ՛ նայեցէք վրաս, ես ինձ համար մէկ
բան եմ։ Երեխայութիւն, էնպէս չէ։

Վարպետս ձեռքիցս առաւ քերականս, մէկ
երեսը դարձրեց—էն արդէն պնակիտի վրա
սովորել էի—«ահա բեզ դաս», ասաւ ու՝ այր խէ
չա, բեն ծա պէն դասը. գնա, սերտիր, ասաւ,

երեխաները որ հաւաքւեն, ես էլ որ տեղս նստեմ,
կգաս դասդ կը պատասխանես»։

Գնացի սենեակը, տեղս նստեցի ու սկսեցի
կարդալ։ Ի՞նչ տեսնեմ. իսկի դժւար չէ եղել,
էլի նոյն այբ բեն գիմ դան էր. էտ էլ շուտ սո-
վորեցի։ Վարպետս դեռ պարտէզում էր, զա-
փռանգի տերեւներն էր փետում ու մէկ տուփի
մէջ շարում։ Գնացի մօտը «դասս գիտեմ» աս-
ի։ Մարդը ապշեց, բայց բան չասաւ, առանց
մէկ սխալի դասս ծայրէծայր պատասխանեցի։ Լաւ,
ասաւ, այժմ էս առ՝ այբ ժէ ճէ ու, բեն ինի
մեն սէ, ինչ որ է»։ Նորից գնացի տեղս. աչքի
անց կացրի նոր դասս, տեսնեմ՝ էն էլ հեշտ է
եղել, էլի իմ գիտցած այբբենգիմդան է, էնքան
որ գրերը մէջէմէջ շարւած են։ Նորից գնացի
վարպետի մօտ, դասս լաւ պատասխանեցի։ Ինչ
խօսքս երկարացնեմ. դեռ տղաները նոր էին
սկսել հաւաքւել—սուտ ասած չը լինեմ—գուցէ
տասը դաս պատասխանեցի ու հասայ ափեհե-
գերին, ու մինչև երեկոյեան զանգերը գրեթէ
գրքի կէսը անցայ։

Պապայիս ասի, պապաս չը հաւատաց,
կարծում էր թէ սուտ էի ասում. բայց երևում
էր որ սկսել էր արդէն աւելի ինձ սիրել, վրաս
տաքանալ։ Ով գիտի, գուցէ մարդը—Աստուած
ողորմի հոգուն—միտք էր անում «էս լակո-
տի ասած քսաներորդ մասն էլ զօրթ որ լինի,

էլի վատ չէ»։ Մամաս խօ խեղճը տեղ չի գրտնում նստելու. սրտի խնդումից ինչ անի չանի, իսկոյն իր տօնական մետաքսէ շորը քանդում է ու ինձ համար Ս. Գէորգի օրւայ գեղեցիկ շոր է ձեռում, մեծաս էլ (մեծ մայրս, տատս) իր ծածուկ սուկուկից հանեց մէկ թանկագին թաշկինակ, գոյնը վարդի պէս կարմիր, վրան՝ սիրամարգի պոչի աչքերի պէս կանաչ-կապոյտ նաշխերով, ու ինձ փողպատցու բախշեց. պապաս էլ խօսք տւաւ որ վաղը առաւօտեան կանուխ բազար գնայ, վարտիկցու կապոյտ նանկա առնի ու մէկ ջուխտ դեղին սափրանէ կօշիկ գնի։

Մարդուս լեզուն կարող է սրտիս խնդումը մեկնել... Կը հաւատաս, էն բոպէին ինձ մէկը թապաւորութիւն տար—աղամարդու համար դրանից լաւ էլ ի՞նչ բախտ կայ—ես էնքան ուրախ չէի լինի, ինչքան որ էն երեկոյեան ուրախ էի... Վերջապէս միւս օրը, մինչև կէսօր քերականս ծայրէծայր աւարտեցի ու բերի պապայիս տի, ճահա, պապա առի, անփնաս յանձնում եմ քեզ քերականս, առի, էլ ինձ պէտք չէ. հիմա կարգը եկաւ պստիկ սաղմոսին»։

Պապաս որ լսեց՝ ապշած բերանը բաց մընաց։ «Հածէ, զորթ ես ասում», ասաւ։—Ապա սուտ պիտի ասէի, ի՞նչ, առի։ «Հանաք ես անում, շան ցգնած։—Ի՞նչու հանաք պիտի անեմ,

ասի պարծենալով, որ չես հաւատում, գնա վարպետիս հարցրո՛ւ։

—«Հայդէ գնանք» ասաւ մարդը—Աստուած ողորմի հոգուն—ու գդակն առաւ, շապ շապ գնաց, ես էլ ետեից գնացի։ Երբոր վարպետիս տունը մտանք. «Բարե, վարպետ, ասաւ պապաս, ի՞նչեր է ասում էս շան ցգնածը, ասաւ ձեռքով վրան ցոյց տալով, զօրթ է սրա ասածը թէ՛ երէկ ու այսօր համ պնակիտը վերջացրել է, համ էլ քերականը»—Հա, ասաւ Մկրտիչ վարպետը, զորթ է, զորթ, հիմա նրա համար մէկ պստիկ-սաղմոս պիտի գնես, էլի մէկ դաստա թուղթ, որովհետեւ, մեր կանոնով, քերական կարդացող տղան դեռ գիր չի գրի, բայց պըստիկ սաղմոսը որ սկսի, գրելուն էլ պէտք է սովորի։ Էսպէս է մեր կանոնը։ Հա, էլի թանաք ու գրիչ էլ առ ու տուր իրան, դրանք էլ պէտք են գրելու համար։

«Հայ, շան կաթ կերած, ասաւ պապաս սրտի ուրախութիւնից. այ ապրես, Մարտիրոս, ապրես. մեռնելը կը կարծէի, էտ տեսակ իմաստուն եղածդ չէի կարծի...» «Տիրացու ախպէր, դարձաւ նա վարպետիս, խեղճը ասում էր, ասում էր—ես չէի հաւատում. մի ասիլ ասածը զորթ է եղել։ Հայ մայրդ մեռնի, էսպիսի էլ դարմանալի բան... Հիմա, փարպետ, ախրը քեզ էլ մէկ բանով շնորհակալ պիտի լինե՞նք, թէ

չէ...» — Էյ ինչ, ասաւ վարպետը սուտ-մուտ քաշելով. առջևներս օրեր շատ, մէկ օր երևի ամեն բան իր ճամփան կը գտնի... «Ճամփան հըն է, հէնց էստեղից ուղղակի ոսկերչու մօտ պէտք է գնանք, մէկ տեսօք արծաթէ մատանիք պիտի պատուիրենք»։ — Ի՞նչ ես էտպէս շտապում... դէ... Աստուծով... տեսնենք... գուցէ... Մարդը սրտի ուրախութիւնից խելքն ու գլուխը կորցրել էր։

Ինչպէս որ ասել էր, էնպէս էլ արաւ պապաս. իսկոյն գնաց ոսկերիչ Մելքօնի մօտ, մէկ հաստիկ, վրան կնիքով մատանիք առաւ, յետոյ գնաց դեղաւաճառ Սարգիսից մէկ պստիկ-սաղմոս գնեց, — հետն էլ պարծեցաւ մամայիս պէս, մէկի վրա տասը աւելացնելով, և տուն բերեց։ «Ահա քեզ պստիկ-սաղմոս, ասաւ, բայց շան երես, տես, շուտ չը պրծնես, թէ չէ՝ փողս գրքիդ հերիք կանի», ասաւ, հանաք անելով։ Իսկոյն գիրքը ձեռքս առայ, բաց արի և սկսեցի ինձ համար կըմկըմալով կարդալ։ Սկզբում մի քիչ դժուար երևացին վանկ-վանկ չը գրած խօսքերը. բայց կարդալով, կարդալով, բաւականին ընտելացայ ու մինչև կերակուրի պատրաստ լինելը՝ գիրքը ձեռքիցս վայր չը դրի։

Կէսօրից յետոյ որ վարպետիս մօտ գնացի, փքւած հպարտ-հպարտ վարպետիս մօտեցայ, էն արծաթէ մատանին ձեռքը տւի, «պապաս բարև

արաւ, ասի, էս քեզ դրկեց, բարի վայելես։ Էս պստիկ սաղմոսն էլ ինձ համար առաւ» ասի. — Շէն կենայ, ասաւ վարպետս ու մատանին մատին հագաւ ու ինձ էլ նոր առած գրքից դաս տաւ, «էս մի քիչ դժուար կըլինի, ասաւ, բայց որ աշխատես, կամաց-կամաց կը վարժես»։

Գնացի, տեղս նստեցի ու սկսեցի կարդալ. չորս անգամ որ ետե ետևից կարդացի դասս, համարեա թէ բերան սովորեցի։ Եկայ վարպետիս առջև, էն տէրտէրի նման ձայնով որ «երանեալից» կարդացի, մարդը բոլորովին ապուշ կտրւեց, բերանը բաց մնաց։ Երկու դաս որ էլի պատասխանեցի, «հերիք է, ասաւ վարպետս, հիմա թուղթ առ, ծալիւր, տետրակ կարիւր, բեր ինձ, քեզ համար տողեմ, օրինակ էլ տամ որ գրես»։ Էնպէս էլ արի։ Բայց գրածս կարդալուս պէս շնորքով չէր, դ, դ, շ, չ, ո, ս, խիստ չարչարեցին ինձ. օրինակին որնայում էի, կարծես հեշտ կերևային, բայց երբ գրիչը ձեռքս առայ ու սկսեցի գրել, մատիս տակից ուրիշ տեսակ բաներ էին դուրս գալիս, օրինակին իսկի չէին նմանում։ Մէկ էլ էս, որ առաջին անգամից իսկի չէի կարողանում տողի վրա ուղիղ գրեմ. կամ գրիչս էր դէպի վեր գնում, գրերս վերևի տողերին էին կաշում, կամ էնպէս ցած էր գնում, որ ներքևի տողին էին հասնում։ Զօռով-մօռով մէկ երես բան գրեցի հայ-հայ երեկոյեան զանգի ժամանակները,

տետրակիս երեսին հինգ-վեց տեղթանաք էր թափել, տեղտեղ էլ գրածիս վրա երեսի քրտինքը կաթել էր, թանաքը փուել էր, ուրիշ տեղ էլ թաց-թաց գրածս թևովս փշացրել էի. վերջապէս ջնջոցի պէս մէկ կեղտոտ բան տարի ցոյց տւի վարպետիս: Գրածս տեսաւ թէ չէ, վարպետս կարծես ուրախացաւ: «Ապա, ջանս, ասաւ, դու կարծում էիր թէ գրել-կարդալը հեշտ բան է. Ձէ, բալաս, էտ հեշտ, շուտով վերջացնելու բան չէ. մենք մինչև էս տեղը հասել ենք, գիտէս՝ ինչեր ենք քաշել: Տղան մինչև մէկ դոյլ (վեդրօ) թանաք չը վիթի ու երեսուն դաստա թուղթ չը փշացնի, լաւ գրել կը սովորի: Գրելը կարդալու պէս հեշտ չը գիտենաս. կարդալը ինչ բան է որ, նրանից էլ հեշտ բան կայ որ, քօռ պառաւ ու քաւթառ նանին էլ լաւ վարպետի մօտ որ տաս, կարդալ կը սովորի: Շնորհքը գրելն է»:

Տղաներն այնպէս բարձր-բարձր ծիծաղեցին, որ ամօթից աչքս մուր կոխեց, սիրտս լցւեց, կըցեցի հեկեկալով լաց լինել: «Հաճէ, ինչու ես լաց լինում, ասաւ վարպետս, ո՛ւյ, մեծսիրտ տղայ ես եղել: Էտպէս հպարտ եղածդ չը գիտէի: Ես քեզ մէկ խօնարհ տղայ գիտէի, մի ասիլ որ փորիդ մէջ չար սատանայ ես ունեցել... Հաճէ յիմար, դու երբ ես լսել, որ մէկ տղայ առաջին անգամից, գրիչը ձեռքը առած չառած պարզ գրի: Էտ դու կարծում ես թէ քերականը

որ լըպըռ լըպըռ կարդացիր պրծար, ամեն բան էլ էտպէս շուտով պիտի սկսես ու վերջացնես: Ձէ, ջանս, գրել-կարդալը էտքան հեշտ բան չէ: Հեշտ բան ուզո՞ւմ ես—դնա գետինը փորիր, ջուր կրիր, ժամի դռանը մուրա—շտէ, քեզ հեշտ արհեստ, իսկ գրել-կարդալը հեշտ արհեստ չէ: Դու շատ քիթ վեր չը քաշես, որ պստիկ քերականը շուտով վերջացրիր: Քերականը ինչ հօրս ցաւն է որ, էն դեռ գրել կարդալուն առաջի երեսն է: Մէկ տեսնենք պստիկ սաղմոսն էլ վերջացրու՝ մեծ-սաղմոսը սկսիր, մեծ-սաղմոսը վերջացրու՝ ժամագիրքը սկսիր. էն էլ որ վերջացնես՝ աւետարանը ձեռքդ առ, էն էլ վերջացրիր՝ Նարեկը կարդա, էն էլ կարդացիր՝ յետոյ Չամչեան կայ, Չամչեանին յետոյ տրամաբանութիւն կայ, տրամաբանութիւնից յետոյ՝ ճարտասանութիւն կայ կարդալու, էն էլ կարդացիր... Դր մէկն ասեմ, նրանց տեղը շատ... Ապա, պարոնս, դու ինչ գիտէիր»...

Տղաները նորից վրաս ծիծաղեցին. ես նորից քեստ ընկայ:

Մինչև էս օրս հասկացած չեմ, ինչու էտպիսի խօսքեր ասաւ վարպետս: Հոգիս վկայում էր որ ես վատ, անպիտան, անպէտք աշակերտ չէի, էտ կծու խօսքերին, էտ ծաղրին արժանի չէի: Էն էլ լաւ գիտէի որ ընկերներս որը միւսներին նայելով, որն էլ նախանձից էին

ծիծաղում վրաս, բայց վարպետիս էտպէս հետըս ժաժ եկածը չը հաւանեցի, դժւարս եկաւ։ Իսկ նա չը գիտէր թէ ես իրեն ինչպէս սիրել էի, էս սուրբ ժամը վկայ որ—ասաւ մատովը Լուսաւորչի դանգակատունը ցոյց տալով—պապայիդ մամայիդ մեռցրու՝ ասէր, կը մեռցնէի, էնչափ սիրել էի էտ անպիտան մարդուն։ Քեզ ի՞նչ ասեմ. էտ մարդը առաջին եկած օրս, առանց պատճառի առնէր վար կախէր ինձ, ոտքիս ֆալախա զարնէր—էնչափ սիրտս ցաւեցրած չէր լինի, ինչպէս որ էտ խօսքերովը... Դու ի՞նչ կասես, հայ-հայ յիսունուհինգ տարի կը լինի, դեռ մտքիցս ելած չէ... Մէկ մէկ ժամանակ միտք եմ անում՝ չը լինի թէ նախանձ էր... միւս կողմից էս էլ կասեմ՝ դեռ ի՞նչս էր տեսել, որ նախանձ էր... Սուտ չէ, դորթ է, երկու օրւայ մէջ ես էն արի, ինչ որ գուցէ ուրիշները երկու տարւայ մէջ չէին անի, բայց ինչպէս որ վարպետն ինքն էլ իր բերանով ասաւ, իմ արածս դեռ գրել-կարդալու առաջին երեսն էր, էնտեղ գուցէ դեռ հազար երեսներ մնացել էին՝ մէկ մէկուց դժւար...

էտ չար բոպէին եմ և վարպետիս միջից սե կատու անցաւ. հոգիս զգաց որ կամ ես էտ մարդու գլխին մէկ խաթա պիտի բերեմ, կամ նա իմ գլխիս... Ախ, հայ վախ, ինչու էն երե-

կոյեան, տուն որ գնացի, էտ ամեն բանը տեղով-տեղով հօրս մօրս չասի, որ նրանք էլ քաշէին, առնէին ինձ նրանից ու մէկ ուրիշ վարպետի տային... Բայց սուս կեցայ, մարդու բան չասի, դարդս սրտիս մէջ խորունկ թաղեցի, հետն էլ թաղեցի իմ բաղդս ու ջահել արես...

Մի կտոր ժամանակից պատիկ-սաղմոսն էլ վերջացրի. պապաս մեծ սաղմոս առաւ, մէկ ամսից էն էլ պրծայ, ձեռքս ժամագիրք առայ կարդալու, երկու-երեք ամսից ժամագիրքն էլ պրծայ՝ աւետարանը սկսեցի։ Էտ միջոցին գիրս էլ կամաց-կամաց կարգի ընկաւ, էնպէս որ եթէ իմ ու վարպետիս ձեռք կողքէ կողք չը դնէիր և մէկ լաւ չընայէիր, գուցէ շատ տարբերութիւնն էլ չը նկատէիր։

Անցաւ էսպէս մէկ տարի։ Ես արդէն Նաբեկն էլ պրծել էի, Չամչեանի քերականութիւնը սկսել էի։ Վարպետս միջից տեղ-տեղ կարդալ կը տար, ինչպէս որ սաղմոսն ու աւետարանը, տեղ-տեղ էլ բերան սերտել կը տար, բայց իսկի խելքս չէր պառկում թէ դա ի՞նչ տեսակ բան է... Սօսքի վրա՝ ի՞նչ ասել է՝ «փառ, փառի, ի-փառէ, դփառ», ի՞նչ ասել է էտ, դրա բուն միտքն ի՞նչ է, ի՞նչ է ուզում ասել, ի՞նչ է ուզում հասկացնել, ի՞նչ է ուզում սովորեցնել, այսինքն՝ ուզում եմ ասել թէ՛ դրա օգուտն ի՞նչ է։ Էլի սաղմոսը, ժամագիրքը, աւետարանը կարդալիս

գիտէի որ աղօթք են. ես էլ որ չը հասկա-
նամ, միտք էի անում, Աստուած կը հասկանայ
հօ և Իրեն տւած փառաբանութիւններս ընդու-
նելի կը լինեն հօ: Բայց այդ Չամչեանի միջի
«փառ, փառի, զփառէն» իսկի բան չը հասկացայ
— հիմա էլ չեմ հասկանում, գուցէ էնպէս էլ չը
հասկացած պիտի մեռնեմ: Ինքս ինձ միտք եմ
անում. «Կամ էտ մէկ անպէտք դատարկ բան է,
դրանցից մարդուն ոչ մի օգուտ չը կայ, կամ
դրա միտքը վարպետս ինքն էլ չը գիտի»:

Մէկ օր, ինչպէս կը լինի որ վեր եմ կենում
վարպետիս ասում. «վարպետ, էտ քերականու-
թիւնից, ասում եմ, մարդ ի՞նչ է սովորում»,
ասում եմ: «Էտ քո խելքի բանը չէ, ասում է,
երբ կը մեծանաս, ասում է, էն ժամանակ
կիմանաս» ասում է:— «Թէ որ — ես էլ դառնում
եմ իրեն ասում — Թէ որ մեծանալուցս յետոյ
պիտի հասկանամ, ասում եմ, աւելի լաւ
էն չէ որ, ասում եմ, թող դեռ մեծանամ և
յետոյ սովորեմ. չը հասկացած բանը սովորելը
ի՞նչ շահ», ասում եմ:— Էստեղ արի, էստեղ:
Մօտն եմ գնում:— Չեղքիդ ափը բաց արա, ա-
սում է: Վախենալով, բայց էլի բաց եմ անում
ափս... Մէկ կը խփի էն ճիպոտով, մէկ էլ կը
խփի, մէկ էլ կը խփի. «չտէ քեզ քերականու-
թեան մեկնութիւնն ու օգուտը. հիմա հասկա-

ցար: Գնա, տեղդ նիստ և մէկ էլ խելքիդ կըտ-
րած չը կտրածը դուրս չը տաս»...

Ափս գնդակի պէս ուռեց. կապոյտ հետքերը
չորս-հինգ ամսից հազիւ անցան, շաբաթներով
չէ թէ գրել, մէկ ասեղ էլ չէի կարող վերցնել
— էնպէս կսկծում էր ձեռիս ամեն մի պճեղը:
Էլի սուս կեցայ, պապայիս մամայիս բան չասի:
Հարցրին «Ինչու ձեռդ ուռել է», ասի թէ՛ «վար-
պետիցս ետ գալու ժամանակ ոտքս քարին դէմ
ընկաւ, սայլի ճանապարհի վրա գլորւեցի, էտ
միջոցին մէկ սայլ մատերիս վրայով անցաւ»:

Կէս տարուց մեծ քերականութիւնն էլ
ծայրէ ծայր վերջացրի, հերթն հասաւ տրա-
մաբանութեանը. բայց էտ գիրքը դեղավաճառի
մօտ չը գտնւեց, եղած չեղածը քաղաքի մէջ
մէկ հատիկը կար, էն էլ Օ... օղուի մօտ էր:
Կամայ ահամայ պիտի Ստամբուլից ապսպրէր:
Մինչև որ գիր գրեցինք, փողը ղրկեցինք, մին-
չև որ էտ տրամաբանութիւնը ձեռներս հասաւ,
անցաւ կէս տարի: Էտ միջոցին ես մէկ անգամ
էլ ծայրէ ծայր քաղաածք արի Չամչեանի քե-
րականութիւնը:

Ես գիտէի թէ տրամաբանութիւնը որ գայ,
էտ անօգուտ «փառ, փառի, փառի, փերեալ
եմ, փերեալ ես, փերեալ է» դերբայ, կոչական,
ածական, իգական-ից կազատւեմ: Բայց երբ
տրամաբանութիւնը ձեռքս առայ ու սկսեցի

երես երեսի ետեից, երես-երեսի ետեից բերան սերտել, էն ժամանակ տեղով հասկացայ որ գրեկ-կարգալը հեշտ արհեստ չէ եղել ու մէկ-երկու տարւայ մէջ չի վերջացւի: Դժւարը էն չէր, որ օրը կամ երկու երեք երես բան բերան անէի, էտ դատարկ բան է. էն ժամանակ էն-պէս սուր միտք ունէի, որ աւետարանից կամ Աստուածաշնչից գլուխ-գլուխ բերան սերտելը ինձ համար մի գաւաթ ջուր խմելու պէս մէկ բան էր: Դժւարն էն էր որ բերանըս կը բլբլաւ, գլուխս չէր մտնում, չէի հասկանում—հիմա էլ էտպէս է հօ—բայց էն ժամանակները մէջս ուրիշ կրակ կար, մէկ անկշտում ծարաւ կար նոր-նոր բաներ իմանալու, ամեն բանի արմատը, իսկը գիտենալու, խօսքի վրայ՝ ինչո՞ւ մեր ձմեռը բուք ու սառնամանիք է, իսկ Նրուսաղեմում—մղղըսիների ասելով—իսկի ձմեռ չը կայ. ինչո՞ւ մեր տեղը ամառը տաք է, իսկ Սիբիրի կողմերը, դեռ էն կողմերն էլ, ասում են թէ՛ ամառ բոլորովին չի լինում, տարի-տասններկու ամիս ձմեռ ու բուք է, ինչո՞ւ գարնանը կռուկները, վայրենի սագերը, արաղիլները հարաւից դէպի հիւսիս են գնում, ինչո՞ւ աշնանը էլի նորից ետ են դառնում: Ընչու ծովի ջուրը աղի է, լճից է գոյանում փայլակն ու կայծակը, ձիւնը, անձրեւը ու կարկուտը. ղորթ է էտ ծեր մարդկանց ասած է թէ ամպը

եղիւ մարդարէի սայլի ակերից է գոռում, լճի-պէս են տպում գիրքը, լճի-պէս են գործում արչան, մախմուրը, լճի-պէս և ինչից են շինում էս մեր պատուհանների ապակին... հարցնելու, իմանալու, սովորելու բան չատ, որ մէկը ասեմ... Բայց ումից իմանայի, ումը հարցնէի, լճի հնարով սովորէի... Երեւի, ինքս ինձ միտք կանէի, կայ էնպիսի մարդ, որ էտամենը գիտի, կայ էնպիսի գիրք, որտեղ էս ամենը գրւած է, բայց որտեղ գտնեմ էտ մարդուն, ուր է էտ գիրքը, ծովի որ անդունդից հանեմ... Մէկ էլ՝ որ գիրքը գտնէի լճի օգուտ, որ հասկանալու չեմ, որովհետեւ էնքան գիրք որ համարեա թէ ամենն էլ բերան սերտեցի, ինչպէս կասեն հո՞ւմ հո՞ւմ կերայ ու միջից բան չը հասկացայ, էն գրքից էլ լճի պիտի հասկանամ... Կա՞յ արդեօք աշխարհիս երեսին էնպիսի մարդ, որ կարողանար ինձ գիրք հասկանալ սովորեցնել... Թէ՛ ամենքն էլ ինձ պէս գիրքը չը հասկացած բերան սովորել են և յետոյ անունները իմաստուն, վարդապետ, տիրացու, վարժապետ է եղել:

Էսպիսի մտածմունքների մէջ էի գիշեր ցերեկ... Հաւուում էի, մաշուում էի... չորս կողմս մէկ խելօք մարդ չը կար, որ սրախս դարդը առջևը վիթէի, որ էս կասկածները կամ հանէր մտքիցս, կամ մէկ ուրիշ ճար ցոյց տար:

Առաւօտեան անկողնից վեր կը կենայի, մամա-
յիս կը տեսնէի, երեկոյեան աչքիս առջև միշտ
պապա էր. էտ ողորմելիներէից ինչ պիտի հարց-
նէի, ինչ պիտի սովորէի: Մամա—Աստուած
ողորմի հոգուն—սիրտս շահել որ ուզենար,
կառնէր ձեռքով փախլաւ, խուռապիւ, տե-
սակ-տեսակ հալւաններ կեփէր, կը դնէր առջևս,
կարծում էր թէ դրանով ինձ մեծ բախտի հաս-
ցրեց. էն էլ ասենք՝ խեղճի ձեռքից աւելի ինչ
կը գար: Պապա էլ—Աստուած հոգին լուսաւորէ
—բերանից կը կտրէր ու ինձ համար գրքի,
թղթի, գրչի փող չէր խնայի —խեղճ մարդու-
վաստակածը քանի՞ կոպէկ էր որ—նա էլ կար-
ծում էր թէ դրանից աւելի որդի սիրել չի
կարելի. յետոյ երկուսն էլ զարմանում էին թէ
ինչու ես ժամանակ-ժամանակ սրտիս նեղու-
թիւնից հայ-հայ միսս եմ ուտում...

Էսպիսով կէս տարի էլ անցաւ:

Գարնան ժամանակներն էր: Մէկ օր առա-
ւօտեան վաղ վարժատուն գնացի: Վարպետը
պարտէզում փոս էր փորում, հէնց էստեղ,
որտեղ որ բանւորդ էս ըրպէիս փորում էր, և
ուզում էր մի ազնիւ ծիրանի ծառ տնկել, նրա
կնիկն էլ պատի մօտ մաղդանոս, տաքիսուն
ու տեսակ տեսակ ուտելու կանաչեղէն էր ու-
րոնում: Մօտեցայ ու «վարպետ, ասի, յոգնել
ես, ինձ տուր բահը, քիչ էլ ես փորեմ»:—Առ,

ասաւ, տաւ ինձ բահը ու ինքը գնաց շուշան-
ների, կակաչների, սմբուլների վրայի հողը շուռ
ու մուռ տալու, որ ջահէլ տերկները դուրս
գան: Էտ միջոցին հարեանի դռնակից մի կինա-
մարդ գլուխը ներս խօթեց «հաքա, Անուշ, էստեղ
ես», հարցրեց:—Հա, էստեղ եմ, ասաւ եանկան
(տանտիկինը): «Էստեղ արի մէկ ըրպէ, բան պի-
տի ասեմ», ասաւ հարեանի կնիկը:—Գալիս եմ,
գալիս, ասաւ եանկան ու շտապով բերեց դա-
բախով կանաչեղէնը, վրան էլ մէկ սիրուն, ձեռ-
մակ ոսկորէ կոթով դանակ ու դրեց փոսի ափին
ու ասաւ ինձ. «փոսը որ փորես պրծնես, էտ
դաբախը խոհանոց կը տանես», ասաւ ու շտա-
պով վազեց դէպի դռնակը: «Էս ինչ սիրուն
դանակ է», ասի ու էլի եմ բանս եմ շարունա-
կում: Փոսը փորեցի պրծայ, բահը դրի փոսի
ափին ու ինքս գնացի սենեակը դասս սերտե-
լու. մտքիցս բոլորովին ելաւ կանաչեղէնով դա-
բախը խոհանոց տանելը:

Անց է կենում ժամ ժամուկէս: Մէկէլ
տեսնեմ եանկան, լեղին պատռած, ներս է
մտնում: «Հածէ՛ Մարտիրոս, ասում է, դա-
բախը խոհանոց չը տարա՞ր», ասում է:—Ձէ,
եանկա, ասում եմ, մտքիցս ելաւ, ասում եմ,
էս ըրպէիս կը բերեմ»: Գնում եմ դաբախը առ-
նում ու տանում տալիս եանկային: «Չախուն
ապա հրտեղ է», ասում է: Այն ժամանակ մե-

նակ նկատում եմ, որ դանակը չը կայ: Վաղելով գնում եմ պարտէզ, փոսի մէջ եմ նայում բերանի հողն եմ շուռ ու մուռ տալիս, քրքրում, անցած ճանապարհս եմ տնդդում, դէս ու դէն եմ ընկնում—դանակը չը կայ: Գալիս եմ եանկայիս մօտ, էսպէս էսպէս բան է, ասում եմ, դանակը կորել է, ասում եմ:—Ի՛, ասում է, իսկի էտպիսի բան կը լինի, ասում է. իսկի լոյս ցերեկով անագին դանակը կը կորչի, ասում է. քորոց է, կեռիկ է ինչ: Շուտով գնա գտի՛ր, թէ չէ գլխիդ էնպիսի բան կը բերեմ, որ մինչև սև հող մտնելը չը մոռանաս,—ասաւ էլ, արաւ էլ անօրէն անհաւատ կինամարդը:

Մէկ էլ գնացի պարտէզ, ամեն ծած ու ծուկ փնտռեցի, ամեն բարի, տերեւի, ճիւղի տակ նայեցի, չը կայ, չը կայ ու չը կայ էտ դանակը, ոտով գլխով կորաւ, զետին մտաւ: Նորից գնացի խոհանոց. «եանկա, ասի, ամբողջ պարտէզը քրքրեցի, տեղ չը մնաց, որ չը նայէի, յոգնեցի, բայց դանակը չը գտայ... Ինչ ուզում ես արա՞»,...—Թէ դու չը գտար, ես կը գտնեմ, ասաւ ու էնպէս խոժոռ աչքով նայեց վրաս, որ կարծես կանգնած տեղս հում-հում ուտել էր ուզում ինձ: «էյ գտի՛ր, տեսնեմ՝ ինչպէս ես գտնում» ասի սիրտս ելած: Ասի ու դուրս եկայ խոհանոցից:

Կատաղած երեսով վազեց կինամարդը վար-

պետիս մօտ: Ի՛նչ խօսեցին, չը գիտեմ: Վարպետը մնաց սենեակում, կնիկն էլ խոհանոց գնաց: Երկու-երեք րոպէից երկու աշակերտ գդակները առան, փողոցի դռնից դուրս գնացին (ես դեռ բակում կանգնած եմ): Երբ որ երեխաները փողոց գնացին, ես էլ մտայ ներս ու տեղս նստեցի, սիրտս էլ էնպէս վատ է, էնպէս վատ է, որ կարծես մահս եկել է. էս է կը մարեմ, սիրտս կանցնի: Ընկերներից մէկը կամաց ինձ ասաւ, որ վարպետս պապայիս ետիւից ղըրկեց էն երկու տղաներին: Վախենում եմ, բայց չեմ երեցնում:

Կէս ժամ չանցած տղաները վերադարձան, պապաս էլ նրանց ետիւից ներս մտաւ: Վարպետս տեղից վեր կացաւ:

«Ես քեզ ձայն էի տւել, ասաւ, որ որդուդ վատ, անազնիւ բնաւորութիւնը աչքովդ տեսնես ու հասկանաս: Էս յանդուգնին, էս անպիտանին—մատով վրաս ցոյց տաւ—ինչքան կարողացայ սովորեցրի, Աստծու առջև կարող եմ ասել որ ոչ մէկ աշակերտին էնպէս սրտով կը պած չեմ եղել, ինչպէս էս լիւր շանը: Իսկի սուտ ասած չեմ լինի, եթէ ասեմ թէ իմ հարազատ որդուս պէս երախտիք ունեցել եմ վրան... Բայց էսքան տարւայ տանջանքիս փոխարէն որդիդ, էս հարամ-սատկելու տղադ ի՞նչով վճարեց... Ականջդ բաց արա ու մէկ լաւ

լսիր: Մէկ որ էս անդգամը ինձ չէ հաւանում, ինձ խենթ, բան չիմացող, իրանից ստոր, անձար մարդ է համարում. դորթ է, բերանով չէ ասում, բայց նշանով, աչքով ցոյց է տալիս, էտ ես նրա ժաժմունքից եմ նկատում: Մէկ էլ աշակերտներին սիրտը ինձնից սառեցնում է. «Ի՞նչ է մեր վարպետը, ոչ մի բան չը գիտի ինքը, ի՞նչ է իր գլխին մէկ խումբ աշակերտ հաւաքել»: Էսպիսի բաներ. էտ էլ ես վրայից, ժաժմունքից, բիթուպուռնգից նկատում եմ— չը կարծես թէ ականջովս լսել եմ, չէ,—սիրտս զգում է որ էտպէս պիտի լինի: Դորթ է, ապացոյց բերել չեմ կարող—մեղքը ի՞նչ առնեմ— ինքս չեմ լսել, մարդ էլ չէ ասել, բայց գիտես՝ որ ասածիս մէջ ոչ մի սուտ չը կայ: Վրա երեքն էլ էս, որ որդիդ գող-աւագակին մէկն է. էտ արդէն կարող եմ ապացուցել: Էսօր առաւօտ որդիդ խիստ վաղ վարժատուն է գալիս, երբ որ հաստատ գիտի որ էտ ժամանակ աշակերտները դեռ հաւաքւած չը պիտի լինեն: Ի՞նչ է դրա պատճառը, մտքում վատ բան չունէր, ով գիտի՝ ի՞նչեր է միտքը դրել անելու. իմ քնած ժամանակը տանս մտնել ուզեցել է, ինձ կամ կնկանս դեղ տալ ուզեցել է, ես ի՞նչ գիտենամ, ախպէր. Աստուած չեմ որ սիրտը մըտնեմ, մէջն եղածը տեսնեմ—թէ աղամորդու սիրտը թէ ծովի անդունդը, երկունս էլ մեզ հա-

մար մութ են. էս մէկ: Ես ինձ համար փոս էի փորում: Որդիդ մօտ եկաւ, աչքիս լաւ մարդ երեւալու համար՝ «տուր, ասում է, վարպետ, բահըդ ինձ, դու յոգնել ես, ես փորեմ»: Դրան ով էր ասել՝ Աստուած կը սիրես, արի ինձ օգնիր: Համարեա քսան տարի վարժապետութիւն եմ անում, էտ քսան տարւայ մէջ քչից-քչից ձեռքիս տակից վեց հարիւր երեխայ է անցել, իսկի մէկ անգամ եղած չէ որ աշակերտներիցս մէկը գար ու ասէր. «Վարպետ, բահդ տուր, փոս փորեմ»: Ի՞նչպէս է որ հէնց Մարտիրոսն է ասում ինձ էտ խօսքը: Եթէ արածը լաւութիւն էր, էտ վեց հարիւր աշակերտներիցս ոչ ոք ինձ լաւութիւն կամեցած չէ ի՞նչ, բոլորն էլ ինձ թշնամի էին, բոլորն էլ անագնիւ, վատ տղաներ էին, իսկ որդիդ նրանց միջից առաջինը եղաւ, որ ասաւ «դու յոգնել ես, արի քեզ օգնեմ»: Ասել է որ միտքը ծուռ էր. էս երկու: Նշանածս նրան տալիս է կանաչեղէնով դաբախ ու ասում է՝ «Իսկոյն այս դաբախը տան, խոհանոցը դիր»: Թէ որ որդիդ լաւ մարդ է, մըտքի մէջ վատութիւն չը կար, ինչո՞ւ իսկոյն չառաւ, չը տարաւ ու ժամերով դցում է գետնի վրայ, ինչո՞ւ է էտպէս անում: Մոռացաւ, կասես, բայց Մարտիրոսի սուր միտք ունենալը ես երկու տարուց վեր գիտեմ, էտ ի՞նչպէս է որ ժամադիրը, աւետարան, բերականութիւն,

տրամաբանութիւն ծայրէ ծայր բերան է սովորում՝ չի մոռանում ու մէկ ջոխտ խօսքը մոռանում է. իսկի հաւատալ կարելի՞ է էտ բանին... Ասել է՝ որ «մոռացայ» ասածը սուտ է, էտ մէկ դատարկ պատրւակ է. նա մոռացած չէ, այլ դիտմամբ էտպէս արել է, մտքի մէջ վատութիւն ունեցել է: Էս քեզ երեք: Վերջի վերջոյ նշանածիս պապայիս ֆնացած թանկագին ինգլիզի չախուն (անգլիական դանակը), որը երկուսս էլ աչքերիս լոյսի պէս սիրում էինք, դաբախի վրայից գողանում է, ով գիտի որտեղ է թաղցնում ու մեզ ասում է թէ կորաւ, իսկի էտպիսի բան կը լինի, ախպէր... աշկարայ բան է որ որդիդ վաղմւց մտքում դրել է էտ դանակը գողանալ, բայց առիթ ունեցած չէ, էսօր որ առիթը պատահել է, էլ ձեռքից բաց չէ թողել: Երբոր որդիդ գողանալու միտք ունեցած չէ, ապա ի՞նչու նշանածիս ասել է՝ «էտ ինչ սիրուն դանակ է». երկի հաւանել է որ գոմել է, էտ ծծի երեխան էլ գիտի որ գողը իր հաւանած բանը կը գողանայ... Շտէ ասելս էս էր: Ահա որդիդ, ահա ես, դու եղիր մեր դատաւորը:

Պապաս տեղն ու տեղը սառաւ. երեսը մէկ ձիւնի պէս սպիտակում էր, մէկ կրակի պէս կարմրում էր. հա իմ վրաս էր նայում, հա վարպետիս վրա: Ի՞նչ անէր խեղճ մարդը. հաւա-

տար՝ մեղաւորը որդին էր, չը հաւատար՝ դանակի կորչելը շատ կասկածաւոր բան էր:

«Հածէ Մարտիրոս, ասաւ ինձ, էս բոպէին որտեղից ուզում ես դանակը հանիր ու վարպետիդ տուր»:

—Պապա, ասի, չառած բանը ի՞նչպէս տամ, չը պահած բանս զրտեղից գտնեմ:

«Մարտիրոս», կանչեց պապաս էնպիսի սասանական ձայնով, որ քիչ մնաց խելքս կորցնէի:

—Պապա, իսկի մի հաւատալ, բոլորը սուտ է. ես գող չեմ, մի հաւատալ, ես չեմ գողացել: Վարպետս իմ վրայ ջիգը ունի, երկուսս արի է: Համարեա վարժարան մտնելու օրից ինձ վատութիւն է ուզում, բայց որ սիրտդ չը կոտրւի, քեզ բան չէի ասում: Մի հաւատալ էտ մարդուն: Չը գիտեմ՝ ի՞նչ է եղել դանակը, գուցէ մէկը ծածուկ պարտէզ մտել է գողացել, գուցէ ագռաւը ոսկոր կարծել թոցրել է, ես ի՞նչ գիտեմ, բայց կուրանամ, կոյր մանգամ որ ես առած չեմ... Պապա, վարպետս քեզ յիմարացնում է, նրա միտքը դանակը չէ, այլ դանակի պատրւակով իր հին ջիգը ինձնից հանել է ուզում:

Էտպիսի շատ բաներ ասի, բայց մումը կասեա. պապայիս աչքը մութ էր կօխել, խօսքը աղանջը չէր մտնում, նա էլի մէկ բերան «հանիր դանակն» էր ասում:

Վերջը վերջը ես էլ վերկացայ ու՝ «պապա, ասի, քեզ մէկ բան ասեմ, ասի. ես տեսնում եմ որ էսօր մահս եկել է. ինչ կուզես, ես պատրաստ եմ»:

«Մարտիրոս, կանչեց պապաս, երեք անգամ քեզ կասեմ՝ կը հանեմ դանակը թէ չէ»:

—Դանակը վերցրած չեմ, ասի:

«Դանակը կը հանեմ թէ չէ», ասաւ երկրորդ անգամ:

—Դանակը մօտս չը կայ, ասի ես նորից:

«Վերջին անգամ եմ ասում քեզ, դանակը կը հանեմ թէ չէ»:

—Պապա, ոտքիդ պագնեմ, դանակը չեմ վերցրել, ասի ու պապայիս ոտքերն ընկայ:

«Բերէք Ֆալախան», ասաւ պապաս:

Յայտնի երևում էր որ մարդու խելքը արդէն վրան չէր:

—Վայ մամա, կանչեցի, փրկիր որդուդ, ինձ պէտք է մեռցնեն էսօր:

Երնէկ թէ ղորթ մեռցրած լինէին:

Ֆալախան վաղուց պատրաստ է, երկու ճիպոտ էլ հետը:

Երեք հատ ուժեղ տղաներ վրաս թափեցին, ինչպէս որ դասաբը կովին, էնպէս էլ նրանք ինձ վայր գլորեցին, կօշիկներս, փաթթոցներս ոտքիցս հանեցին, Ֆալախային պարանը ոտքիս ձիգ ոլորեցին ու էնպէս բռնած պահե-

ցին, մէկ ճիպոտը պապաս առաւ, մէկէլը վարպետս... էլ միտքս չէ...

Երեք օրից որ ուշքի եմ գալիս, տեսնում եմ որ անկողնիս մէջ պառկած եմ, մամաս ու մեծաս, մէկը մէկ կողմս, մէկէլը մէկէլ կողմս, աչքերը ուռած, կեցել են, երեսս են նայում: Տեղիցս շարժել չեմ կարողանում, ամեն ժաժեկածիս՝ կարծես հազար բիզ են խրում ողջ մարմինս: Ոտք ունեցածս չեմ հասկանում, կարծես կտրել են, դէն են գցել: Կամաց-կամաց աչքս վրաս եմ հաւաքում ու անցած բաները մէկ-մէկ, մէկ-մէկ միտքս է գալիս:

Մէկ էլ տեսնես միւս սենեակից սասանական մի ձայն է գալիս. չը գիտեմ մարդու է, չը գիտեմ՝ գազանի, ու շղթայի գնդգնդոց:

«Էս ինչ է էս» հարցնում եմ մամայիս:

—Սուս, ասում է, պապադ է, ասում է:

Խեղճ պապաս, խելքը կորցրել էր ու կատաղել էր:

Նօթն ամիս տեղաշորերից չեմ վեր կացել, հինգ ամիս էլ էնպէս տկար եմ լինում, որ պատերից քսքսւելով կամ նստարանները բռնելով զօռով-զօռով ման եմ գալիս սենեակի մէջ: Էտ միջոցին պապաս էլ մեռնում է—Աստուած գերեզմանը լոյս իջեցնի—երեք հոգի՛ ես, մամաս ու մեծաս մնում ենք որք ու մէկ կտոր սև հացի կարօտ: Մամաս լուսէ լուս ժողովրդի

կարն է կարում, մեծաս էլ դալալութիւն անելով, փալ բանալով, մոմ թափելով, չար-աչք աղօթելով՝ կտոր-մտոր փող են վաստակում. դրանով շտէ գլուխներս ապրեցնում ենք:

Քաղաքի մէջ անունս դանակի գող է դուրս գալիս:

Ես էլ տասն և չորս տարիս եմ մտնում:

Էտհէնց միջոցին աղա Լազարովից էստեղի մէկ աղայի վրա գիր է գալիս թէ՛ «եթէ մէկ էնպիսի գրել-կարգալուս սէր ունեցող աղքատ տղայ կայ էտտեղ, խնդրեմ վերցնես ուղարկես Մոսկով հայի ճեմարան»: Էս որ լսում եմ՝ իսկոյն գնում եմ էտ աղայի մօտ, ոտներն եմ ընկնում, «աբի էտ լաւութիւնը արա՛ ինձ, ասում եմ, համ որք եմ, համ աղքատ եմ, համ էլ կարգալուս սէր ունեմ» — ասում եմ շտէ՛ ինչ որ բերանս գալիս է: Նա էլ — Աստուած բանը աջողէ — խօսք է տալիս. «Երկու շաբաթից պատրաստ եղիր, ասում է. գնացող որ լինի, հետը կը գնեմ կուղարկեմ»: Ձեռքը պաշում եմ, դուրս եմ գնում, ուրախութիւնից վեր վեր եմ թռչկոտում, բայց մերոնց բան չեմ ասում: Երեք չորս օրից մի քաղաքային պահապան է գալիս մեր դուռը ծեծում. «Մարտիրոս անունով էսպէս էսպէս աղայ կայ էտտեղ», ասում է: — Ես եմ, ասում եմ: «Հայդա, արի հետս, աղան քեզ կանչում է», ասում է: Մամաս կարծում

է թէ էլի ով գիտի ինչ փորձանք պիտի գայ գլխիս, խեղճը քիչ է մնում խելքից զրկւի: «Մի վախենար, մամաս, ասում եմ, ու մի երկու խօսքով ասում եմ բանի եղելութիւնը: — Որ էտպէս է, Աստուածամայրը բախտդ բանայ, բալաս, ասում է ու ճամփայ է գցում. մեծաս էլ շտապով փախն է առնում, որ առաջուց իմանայ թէ ի՞նչ համբաւ պիտի բերեմ: Գնում ենք աղայի մօտ. մարդու խոթողացած երեսից հասկանում, որ ասելուն ուրախ բան չը պիտի լինի:

Հածէ, ասում է, դու ի՞նչ երեսով էիր ուզում աղա Լազարովի վարժարանը մտնել. մէկ-երկու դանակ էլ որ էնտեղ գողանաս, էտ հօ բոլորովին կը կեղտոտես նախիջևանցու մաքուր անուսը, ասում է՝ երբ որ պոչդ էտբան կեղտոտած էր, դու ի՞նչպէս համարձակեցիր գալ ու խնդրուել ինձ: Դէ՛հ աչքիցս կորիր, գող-աւագակ, երեսդ չը տեսնեմ»...

Էսպէս իր տնից դուրս կանի մեր աղան:

Լալով-լալով տուն եկայ. Խեղճ մամաս, աչքը դռանը պահելիս է եղել, թէ որդին ի՞նչ ուրախ բաներ պիտի իրեն բերի ու ծերութիւնը մխիթարի. մեծայիս փախն էլ դուրս է եկել շուտով ճամփայ, շատ փող, աղուհաց ու տեսակ տեսակ բարութիւններ: Էս որ լսեցին ողորմելի կինարմարդիկը, աւելի մեծ տրամութեան մէջ ընկան:

Մէկ օր մեծայիս մէկ տուն թեթե թափելու*) ձայն տւին: Էտ տան տէրը տարւայ մէջ ինը ամիս Ստաւրապօլ էր կենում իր առուտուրի պատճառով, տասներկու տարեկան որդուն էլ հետը առել էր ու Էնտեղի թագաւորական վարժատունն էր տւել կարգալու: Մեծաս վարժարանի անունը որ լսում է, կինարմարդոց ոտքերն է ընկնում թէ էսպէս էսպէս, մի թոռունեմ, ասում է, կարգալու շատ սէր ունի, ինքը պատիկ է, բայց մեծ մօրուքով տէրտէրից, վարդապետից աւելի բան գիտի, գովում է մի խօսքով ինձ, Էնքան է ասում, Էնքան է աղաչում, պաղատում, որ էտ կինամարդկանցից խօսք է առնում, որ ինձ էլ Ստաւրապօլ զրկեն Մատթէոս աղայի մօտ, որ նա էլ վարժատուն տայ: Էս որ սարքում է պրծնում, շտապով տուն է գալիս, «աչքդ լոյս, Մարտիրոս, ասում է, չարը խափանեցաւ, բարին կատարեցաւ», ու մէկիկ-մէկիկ պատմում է ինձ, ինչ որ խօսուել էր իմ մասին: Ամենքս էլ ուրախանում ենք:

Բայց օրեր են անցնում՝ բան չը կայ, շա-

*) Հիւանդութիւն կամ թուլութիւն ունեցողի հին շորի մէջ կիսայրեալ մօմ են բերում եկեղեցուց, հիւանդի գլխի տակն են դնում. միւս օրը ամանի մէջ հալեցնում են և յետոյ թափում ջրով լցւած պնակի մէջ՝ երեք անգամ գլխի վրա բռնած, երեք անգամ սրտի, երկու անգամ ծնկների և մէկ անգամ ոտների վրա: Իբր թէ սրանով հիւանդը բժշկւում է: Ծ. Թ.

բաթ է անցնում՝ բան չը կայ, վերջը վերջը ամիս է անցնում, էլի բան չը կայ: Մէկ օր մեծաս վեր է կենում ասում է. «Էս ի՞նչ դարմանք բան է էս, ասում է, էսքան ժամանակ մէկ խաբար չի լսւում, ասում է, մոռացել են թէ խաբեցին մեզ, ասում է. էսպիսով բան դուրս չի գալ, վեր կենամ մէկ ինքս գնամ իմանամ. ծանդր կեցած քարի տակից ջուր չի վաղիլ» ասում է՝ ու ֆարաջան հագնում է, գլխին թաշկինակ է փաթաթում, փայտը ձեռքն է առնում, տըպտըպալով ուղիղ դէպի Մատթէոս աղայի նըշանածն է գնում: Իրիկնադէմին ճրագ վառելու ժամանակները ոտները թրեկով, ուրախ երեսով ետ է գալիս:

«Ինչ մագարիչ ես տալու», ասում է ինձ:

—Առաջին տարւայ ռոճիկս ամբողջովին քեզ երուսաղէմի ճամփի փող, ասում եմ:

«Է՛յ, բայաս, ասում է մեծաս, էն օրը որ գայ, ով գիտի՝ ոսկորներս էլ փթած կը լինեն: Աւելի լաւ է, էգուցայ բանը տեսներ: Ահա քեզ ուրախ խաբար. վաղը չէ մէկէլ օր Մատթէոս-աղային էստեղից երեք սայլ բաղկալի ապրանք պիտի զրկեն: Եթէ չես վախենում—որովհետեւ էն ժամանակները աւագակ չերբէզներից վախ կար—նստիր և գնա. միացածն էլ Աստուած գիտի»:

Ինչպէս որ ասում է, էնպէս էլ անում ենք:

Մեծաս զոնէդուռ է ման գալիս, մէկից հին մուշտակ է խնդրում, միւսից տաք մէսթ*) է մուրում, մէկ ուրիշից էլ մորթէ գլակ է առնում. փաթաթում եմ, կապկալում եմ, մէկ պատիկ բօխչա՝ ինչ ասես շորերով, ճամփի պաշարով, կռան տակս եմ գնում, գնում եմ սայլն եմ նստում ու ճամփայ ընկնում:

Ինն օրից Ստաւրապոլ ենք հասնում: Գընում եմ էտ Մատթէոս-աղայի մօտ, գլխիս եկած ամեն բանը պատմում եմ, որ ասես մէկ բան չեմ թագցնում՝ լաւս էլ եմ ասում, վատս էլ ասում: Բայց տեսնում եմ որ մարդու երեսը մէկ տեսակ է լինում, երևում է որ պատմածիս չի հաւանում, կարծես դժւարանում է, բայց — էլի շէն կենայ — բան չի ասում:

Մէկէլ օրը ինձ վերցնում է, տանում է մեծաւորի մօտ և խնդրում է որ վարժատուն առնի:

«Գլխագիր ունե՞ս», հարցնում է ինձ մեծաւորը. Հանում եմ ծոցից. իրան եմ տալիս:

«Տասն և չորս տարեկան ես», հարցնում է: — Հայ, ասում եմ:

«Ռուսերէն գիտե՞ս», ասում է:

— Ձէ, սովորած չեմ, ասում եմ:

«Թւաբանութիւն գիտե՞ս», ասում է:

— Ձէ, սովորած չեմ, ասում եմ:

*) Փափուկ կաշէ (սափիանէ) գուլպայ: Ծ. Թ.

էլի մի քանի չը սովորած բաներս է հարցնում: Որը հասկանում եմ, որը չէ: Մեծաւորը քիթուպոռնգը ցած է թողնում: Մատթէոս-աղան կարմրում է:

«Օրէնքով վարժատուն առնել չէր կարելի քեզ, բայց ասում է, Մատեյ Կարպիշին խաթեր համար կամայ-ակամայ պէտք է յարգեմ, ասում է մեծաւորը, բայց ամենաստորին դասարանը պէտք է քեզ նստեցնեմ», ասում է: Ուրախութիւնից չը գիտեմ՝ ինչ անեմ. մեր աղաթով գնում եմ մեծաւորի ձեռքն եմ պաշում. մարդուն դուր է գալիս:

«Վրայից երևում է որ մաքուր սրտով տղայ է, բնաւորութիւնն էլ դեռ փշացած չէ», ասում է Մատթէոս-աղային, վրաս աչքով նշան անելով: «Կաշխատե՛ս, լաւ կը սովորե՛ս»: հարցնում է ինձ:

— Սովորելու որ չը լինէի, ինչո՞ւ վայրենի դաշտերը կընկնէի, կը գայի էստեղ, ասում եմ:

Ծիծաղեց մարդը. մի քիչ էլ մնացինք ու վեր կացանք տուն եկանք:

Ճամփին Մատթէոս աղան դառնում է ինձ և ասում.

«Հածէ, գլուխդ գովում էիր թէ շատ բան գիտես, տեղն որ եկաւ ինչո՞ւ պաշո՞ւք բաշեցիր, ինձ էլ ամօթով թողիր»:

Նս բան չասի, սուս կեցայ: Ախպէր, ի՞նչ

ասէի. իմ տարիներով սովորածս էստեղ բանի պէտք չեկաւ, դրանց սովորեցրածն էլ ես սովորած չէի: Տեսայ որ Մատթէոս-աղան առաջին օրից վատ աչքով նայեց ինձ, բայց բան չասաւ, էն էլ շնորհակալ եմ:

Մէկէլ օրը առաւօտեան վաղ գնացի վարժատուն, մինչև կէսօր մնացի. երկու վարժապետ եկան, երկուսն էլ դաս տւին. կէսօրից յետոյ մէկ էլ գնացի, էլի երկու ուրիշ վարժապետ եկան, նրանք էլ դասեր տւին: Միւս օրը բացի նրանցից, էլի չորս ուրիշ վարժապետներ եկան, ամենքն էլ ուրիշ-ուրիշ դասեր տւին, գնացին: Գիրք չունէի, ի՞նչ անէի, ո՞ւմ ասէի, ո՞ւմից աղաչէի առնէի: Եթէ Մատթէոս աղային ասէի թէ ինձ ութը գիրք է պէտք, հազիւ թէ առնէր տար, որովհետեւ վրայից երևում էր, որ ինձ տաք աչքով չէր նայում, էնքան էր որ մէկ փոր հաց խնայելու քաշուում էր: Նրա որդուց ուզէի, էն էլ գիտեմ որ խօսքս զուր պիտի անցնէր, քանի որ նա առանց իմ ասելուն էլ գիտէր գիրք չունեցածս, բայց մէկ բերան խօսք չասաւ թէ՛ ինչի վրա դասերդ պիտի սովորես. երևում էր որ նրան էլ դուր չէր գալիս վարժատուն մտածս:

Դասատան մէջ մի քանի բարի երեսով տղաներ նկատել էի, հարցնելով-հարցնելով գնացի գտայ նրանց տունը, ամենքից էլ մէկ-

մէկ կամ երկու-երկու գիրք վերցրի, եկայ տուն, քաշեցի մի անկիւն և սկսեցի ինձ ու ինձ սովորել: Միտքս, փառք Աստծու, սուր էր. էտ կողմից միամիտ էի. դասերս էլ որը վեց տող էր, որը ութը տող—էտ ինձ համար մի բան չէր. թւաբանութեան վարժապետը ոչինչ տւած չէր, նրանք՝ սե տախտակի վրա տեսակ-տեսակ հաշիւներ էին, էտ ոչինչ. դեռ դասարանից դուրս չեկած գիտէի:

Մէկէլ օրը, երբ վարժատուն գնացի և հերթը ինձ հասաւ, դասերս էնպէս լաւ պատասխանեցի, որ վարժապետներս զարմացած մնացին, իրենց ձեռքի թղթի մէջ անունս ու ազգանունս գրեցին և զովեցին—էտ թղթի անունը մէկ տեսակ էր, բայց վաղուցւայ բան է, մոռացել եմ՝ գնացել է:—Մեծաւորը եկաւ, էտ թուղթը աչքի անցրեց, «մալադեց Սըվաճիով, ասաւ, աշխատիր, ասաւ, մէկ օր մարդ կը լինես», ասաւ:

Երեսից երևում էր որ լաւ մարդ էր: Ախպէր, ժողովուրդը ինչ կուզէ թող ասի, բայց էտ կազակ ազգը հարբան է, ինչ է, ինչ չէ, էլի սիրտը մաքուր է, մեղպէս նախանձոտ, չարկամ, բամբասող, մարդու միսը ուտող չէ...

Էսպիսով կէս տարի գնացի եկայ վարժատուն. պարծանք չը լինի ասածս, օրէցօր աւելի ու աւելի լաւ էի սովորում և վարժապետներին ու մեծաւորին աչքն էի մտնում. կազակ ընկեր-

ներս ինձ սիրում էին, շէն կենան, գիրք, տետրակ, թուղթ, գրիչ, քարեգրիչ, ինչ որ պէտք էր, ամեն բան տալիս էին, ես էլ որին դասն էի սովորեցնում, որին էլ ձեռքիցս եկած պատիկ մատիկ լաութիւններ էի անում, մէկ խօսքով եղբայր եղբօր պէս էինք ապրում: Բայց Մատթէոս-աղայի որդին հետս լաւ չէր. վրաս նայել չէր ուզում, ամաչում էր հետս խօսել, խաղալ կամ դաս սովորել, ամեն պատահողին ասում էր թէ՛ ես վատ ազգից, չքաւոր, ռամիկ աղայ եմ... պապան էլ էսօր էգուց անից փախցնել է ուզում, էնքան է որ՝ մէկ պատճառի է ման գալիս:

Ասում էր, բայց նրա խօսքը բանի տեղ դնող չը կար:

Ամառը եկաւ, քննութիւնները սկսեցին: Ինձ առաջին դասարանից երկրորդը տարան— ընդամենը կէս տարի ֆնացի առաջին դասարանում,—լաւ սովորելուս ու գովելի բարքիս համար անունս կարմիր տախտակի վրա գրեցին, մէկ հատ էլ գիրք բախշեցին:

Մէկէլ տարին դասատան մէջ էն առաջին աշակերտն էի յիշում, էսպէս էլ ֆնացի մինչև դուրս գալս. դասատուն դասատան ետեից, դասատուն դասատան ետեից փոխեցի ու Ստաւրապոլ գալուս երրորդ տարին արդէն չորրորդ դասատանն էի:

Դեռ նոր էի չորրորդ դասատունը անցել, որ գլխիս նորից փորձանք եկաւ:

Մէկ օր Մատթէոս աղան տօնավաճառից ուշ տուն է գալիս, հանում է, ծոցի փողը— իրեն ասելով— քսակով սեղանի վրա է դնում, ճրագը հանգցնում է պառկում: Միւս օրը որ անկողնից վերէ կենում, քսակը պտրտում է— քսակը չը կայ: Խանութի տղաներիցն էլ մէկն էլ չը կար, ամենքն էլ տօնավաճառն էին. ծառայ էլ չունէինք— նոր դուրս էր գնացել— տանը ես էի, ինքն էր և որդին էր. երեքիցս մէկն ու մէկը գողացած պիտի լինէր, բայց ո՞վ. ակներև չէ. կասկածը իսկոյն ինձ վրա է ընկնում. էտ դանակի բանն էլ նորից աշխարհ է գալիս: Ես երգում պատառ եմ լինում, երկնքի ամեն սուրբերի անունն եմ տալիս, վկայ եմ բերում, բոլորն էլ դուր է: Մատթէոս աղան հրամայում է որ շուտով աբուռ— չուբուռս հաւաքեմ, վեր կենամ նախիջևան գնամ: Լաց լինելով գնում եմ մեծաւորիս մօտ, էսպէս էսպէս բան է, ասում եմ: Նա էլ լո՛ւնչ անի խեղճը: «Ժալքը, ժալքը» (ափսոս)...

Նորից նստում եմ սայլը, գալիս եմ նախիջևան:

Մամաս որ իմանում է էս նոր անբախտութիւնս, թուլանում ընկնում է. քացախով, ջրով, նաշաղիրով զօռով ուշքի են բերում ողորմելի

կինամարդուն: Մեծաս փալ է բաց անում ու ասում է. «փողը անպատճառ պիտի գտնւի ու անմեղութիւնս լոյս պիտի գայ. ինձ էլ նորից ձայն պիտի տան Ստաւրապոլ»:

Էս անգամ մեծայիս փալը ղորթ է դուրս գալիս, բայց միայն կէսը. էս կորած քսակը Մատթէոս-աղայի վարաիկի զրպանից է դուրս գալիս: Սիրտս շահելու համար նշանածին նամակով ապսպրում է, որ ինձ երկու ֆունտ չամիչ, երկու ֆունտ խուրմա, քսան կոպէկ էլ սև փող տան ձեռքս ու ճամփեն: Ինչպէս է լինում որ մեծաս նրանց տունն է գնում. էս նամակը առջևը կարդում են, չամիչն ու խուրման թղթի մէջ են փաթաթում, ձեռքը տալիս, փողն էլ ծոցն են դնում:

«Մեծա, ասում եմ, ինչու առիր, ասում եմ, էս մէկ է թէ իմ անմեղութիւնս ծախածի պէս բան եղայ», ասում եմ:

—Որ չառնէի, ասում է մեծաս, անմեղութիւնդ բոլորովին ձրի տւած պիտի լինէիր հօ, ասում է:

Լաւ որ միտք անես, մեծայիս ասածը ղորթ էր, բայց միայն հայերիս մէջ: Դանակի բիծը կար հօ վրաս, քսակով փողինն էլ որ կպաւ, բոլորովին արատաւորեցի, էլ երես չունէի քաղաքի մէջ մնալու, շուտով մի հնար պիտի գտնւէր Նախիջևանից ելնելու, բայց ուրեք երթա-

յի, ով իր տանը կառնէր ակներե երկու գողութիւնների մէջ բռնւած տղին...

Մեր ազգը ի բնէ էտպէս է. վատ բան լըսելու երկու սուր ականջ ունի, լաւ բանի համար ոչ մէկը: Քսակով փող գողացածս ամենքն էլ լսել էին, բայց քսակի Մատթէոս աղայի վարաիկի զրպանից ելածը՝ մէկ մարդ էլ լսած չէր. ինչպէս ախր չը տրաքւես...

Մէկ օր տան դռնակի առջև կանգնած եմ ինձ համար, նայում եմ՝ առջևիցս մի կազակ է անցնում, գտակը հանում է և գլուխ է տալիս. «էս ինչ մարդու տունը ուրն է», հարցնում է:

—«Էտպէս էտպէս գնա, կը գտնես», ասում եմ. յետոյ իրեն եմ դառնում և հարցնում. «Դու ով ես»:

—Ես նրա հովիւն եմ, ասում է:

«Ո՞րտեղից ես գալիս», ասում եմ:

—Սև ծովի ափերից, ասում է:

«Զիդ-սայլդ ապա ուրեք է», ասում եմ:

—Զի-սայլ չունեմ, ասում է, ոտքով եկել եմ, ասում է:

Իսկոյն միտքս բան է ընկնում: Մարդը գնում է:

Միւս օրը մերոնց բան չեմ ասում, կամացուկ անից դուրս եմ գալիս, ուղղակի գնում, ռաստ եկողին հարցնելով, ձիշտ երկու շաբաթից ոտքս Եկատերինադար եմ դնում. էս հային եմ

գնում, էն հային եմ գնում, վերջը վերջը մէկին գտնում եմ, տարին երեսուն և հինգ ուրի վարձով,—էն ժամանակները փողը դեռ ասի-գնացիայով (թղթադրամով) կը համարէին,—խանութի աշկերտ եմ մտնում: Որտեղ սովորածս, ինչ գիտեցածս, ում որդին եղածս ոչ մէկին էլ չեմ ասում, — ճշմարտութիւնը ասելու համը մէկ անգամ առել էի:

Վեց տարի ֆացի տիրոջ խանութում. էտ միջոցում մէկ անգամ թարս խօսք ասել չը տւի, մէկ օր հաշիս մէջ մի դոռ զաւակս չեկաւ,—հարիւրներ հօ աւելի էր ձեռքիցս անցնում—էն ոչինչ: Սանութպանը էնքան վստահացել, հաւատացել էր ինձ, որ ամիսներով ոտքը խանութը չէր գնում... Եղած չեղածը մի տասներեք-տասնըչորս տարեկան աղջիկ ունէր, տեղն եկած ժամանակ միշտ ասելիս է եղել մօտիկ մարդկանց — «կատինիս թող տարիքը լրանայ, կառնեմ Մարտիրոսին կը տամ, խանութս էլ նրա վրա կը գրեմ, դրանից յետոյ հայր-որդու պէս բան կը լինենք»: Լսողներն էլ իսկոյն լուրը ինձ կը բերէին: Ես էլ յոյսով կեցել եմ թէ էսօր չէ վաղը քառասուն հազարանոց խանութի տէր պիտի լինեմ: Վարձս էլ չեմ առնում, թէ ինչէ՞ երբ էլ որ լինի՝ ամենն էլ իմն է... Դու մէկ նայի թէ դեռ գլխիս ինչեր կան դալու...

Տէրս վաղուց Նախիջևան գնացած չէր: Մէկ օր էլ վեր է կենում և ասում ինձ. «Տածէ, գիտեմ ինչ, ասում է, սիրտս մէկ Նախիջևան գնալ է ուզում, ասում է. ի՞նչ ես ասում», ասում է: Ես բան չասի, բայց սիրտս շրվարաւ: «էտ ամենը մի հարիւր յիսուն ուրբու բան չէ, ասում է տէրս, թքել եմ վրան, հայդէ արի երթամ... Ետ որ դամ, Աստուծով, նշանդ էլ կը գնենք, աղջիկս էս էս է տասնըհինգ տարեկան կը լինի. եկող տարի էս ժամանակները պսակներդ էլ կը համբուրեմ ու՛ մաղս էլ պատից կը կախեմ... չերիք է ինչքան չարչարեցի, հանգստանալու ժամանակն է, մի քիչ էլ դու տանջւիր...»

Կուզէի ասել՝ «մի գնա», տեղով էլ գիտէի որ խօսքս կը լսէր, բայց չասի. «ինչ լինելու է՝ թող լինի», ասի մտքիս մէջ... Ինչ ես կարծում, հոգուս զգացածը հօ զուր չեղաւ...

էտ իմ տէրս որ Նախիջևանից ետ դարձաւ, էլ առաջւայ մարդը չէր, բոլորովին փոխւել էր. մէջը սառնութիւն մտել էր: Առաւօտւանից մինչև երեկոն կը դար խանութում կը ֆնար, ամեն բոլէ մատեանս աչքը կանցնէր, դախի մանր փողը կը համարէր, չթի ու ապրանքի թոփերը կը համարէր, երբեմն էլ թոփերը չափել կը տար: Շուտ հասկացայ քամու որտեղից փչացածը, բայց սուս կեցայ. տեսնեմ՝ դրա վերջը ինչ կը լինի, ասի մտքիս մէջ:

Անցնում է էսպէս շաբաթ, շաբաթ ու կէս... Մէկ օր տեսնեմ, տէրս մի ամուրի նախիջևանցի տղայ է բերում խանութ ու խանութի բարին ամենը նրան հաշուով է տալիս, ինձ էլ նրա ձեռքի տակ է դնում։ Էլի սուս կեցայ, տեսնեմ սրա վերջն էլ ինչ կը լինի, ասում եմ մտքիս մէջ։ Մէկ էլ ի՞նչ լսեմ. տէրս էտ նոր մտած խանութի տղի խօսք է տւել իր աղջիկը նրա հետ նշանելու... Էտ էլ կուլ տւինք։

Երբեմն մտքիցս կանցնի թէ կենդանիները մէջ ո՞րը աւելի է չարքաշը, դիմացկունը. մի ասիլ որ ադամորդուց աւելի դիմացկունը չի եղել։ Ուրիշ անգամ էլ էսպէս միտք եմ անում՝ երանի, ասում եմ, մարդկանցից էլ էն ամենագիմացկունը հայը չէ։ Խօսքի վրա, իմ տեղս մի ուրիշ ազգի մարդ, ռուս, նոդայ, ֆրանցուզ, գերմանացի որ լինէր, գլուխս ծռած, էտքան մարդոց վատութիւնին, թշնամութիւնին կը դիմանար, թէ՞ «թքել եմ վրաներդ» կասէր ու գրլխի ճարը կը տեսնէր, խելքի կտրածի պէս։ Ասողներ կան—գուցէ գրքի մէջ էլ գրած է, ով դիտի—ասողներ կան որ ինքն իրեն մեռցնելը հոգուն մեղք բան է, դրա համար, ասում են, Աստուած մեր հոգին դժոխք է տանում. որ էտպէս է, ապա ի՞նչու մարդս անբախտ է, ուզում եմ ասել թէ՛ էտ հրաման տւողը ի՞նչի բանը էն տեղն է հասցնում, որ ողորմելի մարդը աշ-

խարհիս վրա ապրելը մեռնելուց վատ է ճանաչում ու—մեղայ Աստուծո՞ւ մեղայ—կամ դեղ կը խմի, կամ պարանը վզին կը դցի, կամ ջուրը կընկնի, կամ ճակատին դնդակ կը տայ... Չը գիտեմ, ախպէր, խելքիս բանը չէ։

Մէկ օր խանութում նստել եմ, վիզս ճուկ։ Միտք եմ անում, գլխիս անցած բաները շարանշարան աչքիս առջևից կանցնեն ու ինքս ինձ կը հարցնեմ՝ արդեօք անբախտութիւնս վերջացա՞ւ. մէկ էլ գլուխս բարձրացնեմ ի՞նչ տեսնեմ, տէրս դիմացս կանգնել է, վրաս է նայում.

«Հաժէ Մարտիրոս» ասում է։

—Համմէ, աղա, ասում եմ։

«Գիտես՝ մէկ բան ունեմ քեզ ասելու», ասում է։

—Ի՞նչ է ասելուդ, կասեմ։

«Ես քեզ ճամփա դնել եմ ուզում», ասում է։

Սարսափս կը գայ։

—Ի՞նչու, ասում եմ։

—Սիրտս շտէ էնպէս կուզի, ասում է. էս խանութի տէրը ես չեմ...

—Պատճառը, ասում եմ։

Երեսը դարձնում է նոր եկած խանութի տղին ու ասում է—իսկ խօսքը ինձ է, դիտես.

«Մէկ էս լիրը անամօթին տես, երեսը կաշի արել է ու ինձնից պատճառներ կուզի իմանալ, ամեն տեղից հարած-վարածը մոռացել է, դեռ կարող է ուզիդ աչքիս մէջ նայել»։

Յեառոյ դառնում է ինձ և ասում.

«Դու պատճառ կուզես իմանալ, հմ. պատճառը էս է — դու գող ես»:

— Ե՞րբ գողութիւնս բռնել ես, ասի:

«Մենակ ես բռնած չեմ քո գողութիւնդ, հաղար մարդ բռնել է: Դ՞ու չէիր վարպետիցդ դանակ գողացողը, դրա համար չէր որ քեզ վարպետիդ մօտից փախ տւին, քո պատճառով չէր որ պապադ խեցաւ, յետոյ էլ մեռաւ ողորմելին, աղա Լազարովի ուսումնարանից քեզ դուրս չաւրին: Ստաւրապոլ Մատթէոս աղայի քսակով փողը դ՞ու չէիր գողացողը. դրա համար քեզ թագաւորական վարժատանից չը վռնդեցին, անամօթ շուն... Մեղքդ որ գիտես, գոնէ շան պէս պոչդ քեզ քաշիր, է... էս խաբեբային նայիր, պատճառ կուզի իմանալ: Անամօթ երեսիդ թքեմ—այ քեզ պատճառ. գող ես, շտէ, գնդ ես: Ես խանութիս մէջ գող մարդ ունենալ չեմ ուզում, հասկացար, գլուխդ մտաւ: Շտէ քեզ պատճառ»:

— Լաւ, ասի, տուր վեց ու կէս տարւայ վարձս, երթամ:

«Ի՞նչ վարձ, ի՞նչ բան, ի՞նչ փստան... Ում ես յիմարացնում: Քեզ պէս աշկարա գողը իր վարձը վաղուց առած կը լինի, գուցէ աւելով էլ... Շուտով ել խանութիցս, թէ չէ ոստիկաններով կը հանեմ ու ձեռքդ ոտքդ շղթայակապ

անել կը տամ, էնպէս ոտքով կուղարկեմ Նախիջևան: Էս օտար քաղաք է, դու Նախիջևան չը գիտենաս, էստեղ մենք զգոյշ պիտի կենանք, թէ չէ մէկ որ հայերիս անունը կտորւի, մէկէլ ուղղելու դուռը չը կայ. դրա համար շտէ չեմ ուզում գլխիդ աղմուկ բանալ... Դէ հայդէ, որ տեղից եկել ես, էլի էնտեղ գնա:

— Աղա, ասի, առանց փողի ի՞նչպէս երթամ, ո՞վ ինձ կը տանի. ճամփին ախր ուտել խմել պէտք է, ո՞վ ինձ ձրի հաց, ջուր, պառկելու տեղ կը տայ: Մէկէլ որ Նախիջևան գնացել եմ, գիտե՞ս հօ,—դանակ ու քսակ գողանալս քեզ ասողը էտ էլ երևի ասած կը լինի—էնտեղ ծեր մայր ու մեծ մամա ունեմ, ի՞նչ ասեմ երթամ, նրա ծերութեան նեցուկ լինելու տեղ՝ գլուխներին ծանրութիւն երթամ. Աղա, ոտքդ պաչեմ, մի անի էտ վատութիւնը, տնիցդ փախ մի տալ, ինձ մի խայտառակիլ: Վեց տարւայ երախտիքս ի՞նչու մոռացար, ի՞նչու մոռացար որ սրանից երկու ամիս առաջ...

Էլ չը կարողացայ բան ասել, արցունքս հայհայ խեղդում էր...

Տէրս քսակը բացեց, միջից տասը հատ թուղթ փող հանեց, առջևս շարտեց ու առաւ.

— Էս քեզ չէ, ծեր մօրդ, մեծայիդ է. քեզ էս էլ կը լինի, ինչ որ վրայի շորիդ ու ժիլէտիդ աստառի մէջ կարել ես թագցրել»:

Առի յիսուն ռուբլին, պաշեցի տիրոջ ձեռքը և ելայ խանութից: Իսկոյն բազար գնացի, վրայիս մահուդէ շորը ծախեցի, տեղը ռուս մուսթիկի կոշտ շորը առայ, հագայ և ոտքով եկայ Նախիջևան: Մեծաս մեռել էր, մամաս էլ իրեն ծեր տեղով մէկի միւսի լւացքն անելով օրն էր անցկացնում, էսօր կէս կուշտ, վաղը քաղցած:

Նախիջևան որ եկայ, քսան և երեքիս մէջն էի, ճիշտ էն տարիքս էր, երբ մարդ դեռ նոր աշխարհ է մտնում և աշխատանքի համն է տեսնում: Բայց դու արի տես որ էս ծաղիկ տարիքիս մէջ աշխարքիս բանից պրծել ձեռք էի վերցրել ու կեանքիս թոյնը պիտի ուտէի ու լեղին խմէի... Ախ, աշխարք, աշխարք:

Հաւ է որ էս վեց ու կէս տարւայ մէջ երեսս էլ փոխւել էր, էն դանակի ու քսակի պատմութիւնն էլ մոռացւել էր: Իմ ուզածս էլ էտ էր:

Մէկ օր բազար ելայ, մի հատ աժանագին ձի առայ, յետոյ պատահմամբ մի տակառասայլ և ձիու սարք առայ և էն օրից ի վեր մինչև էսօր—ճիշտ քառասուն և երկու տարի է—ջրրկիրութիւն եմ անում»:

Մի քիչ յետոյ Մարտիրոսը ասաւ.

«Աղա, մօտդ մանր փող չունե՞ս, հինգ տակառ ջուր եմ բերել, մի մանէթ կանի... Ջիւու համար մի քիչ խոտ ու դարբի պիտի առնեմ,

հայվանս երէկանից ի վեր քաղցած է, տանն էլ խեղճերը քանի ժամանակ է ինձ են սպասում, մի մի կտոր հաց նրանց էլ պիտի տրւի:

—Ահա քեզ քսան մանէթ,—ասի ու ձեռքը կուղէի երկու տասանոց դնել,—մէկ մանէթը ջրրիդ համար, տասներինն էլ պատմածիդ համար:

«Ինչ ես անում,— ասաւ Մարտիրոսը,— վարձս ինչ որ է՝ էն տո՛ւր. դրա համար էլ շնորհակալ կը լինեմ: Վացունը հինգս լրանում է, հակալ կը լինեմ: Վացունը հինգս լրանում է, աղքատութիւնից աչք բացած չեմ, բայց էլի մարդու ձեռքս մեկնած չեմ, սրանից յետոյ չէ թէ ամօթ, հոգուս մեղք էլ է մուրալը: Էսօրւայ օրս ջրկիր եմ, բայց—սրանից էլ ստոր դեռ ի՞նչ պարտավունք կայ—էլի մտքիցս դուրս չի գալիս որ մէկ օր ազնւական տղաների հետ կողքէ կողք նստել եմ ու լաւ լաւ մարդկանցից փողքէ փողք նստել եմ... Վաղուց է մոռացել էի էս բան սովորել եմ... Վաղուց է մոռացել էի թէ սրտիս դանակի պատմութիւնը, կարծում էի թէ սրտիս վէրքը արդէն փակւել էր, բայց էսօր յիսուն ու հինգ տարւայ կորուստս որ գտայ՝ նորից առիւնը սկսեց կաթելու... Հէյ ժամանակ, ո՛ւմ մտքից կանցնէր որ էս ժանգոտած դանակը, որ գոռ չարժէ, ժամանակով մի շէնքով օջախ քանդել է»...

—Մարտիրո՛ս, ասի, քեզ մի բան հարցնեմ, յօրթը կասե՞ս, ասի:

«Մէկ տեսնենք ի՞նչ պիտի հարցնես, ա-

ասաւ. թէ որ կարողանամ՝ կասեմ, ինչու չէ»:

— Էտքան անբախտութիւնիդ մէջ ունի ես աւելի մեղաւոր ճանաչում, ասի:

«Ես քեզ մի զորթ բան ասեմ, ասաւ: Երբ որ դու ուղիղը կուգես իմանալ, ասաւ, իմ անբախտութիւնիս մէջ մեղաւորը մենակ ես եմ»:

— Ի՞նչպէս, ասի, զարմանալով. ապա Մկրտիչ վարպետը, ապա Մատթէոս աղան, ապա խանութպանը...

«Էն ամենը դատարկ բան է, նրանք ոչ մի մեղք չունեն, նրանք էն արին, ինչ որ խելքները կտրեց, ես էլ էն պիտի անէի, ինչ որ իմ խելքն էր կտրում: Ես քեզ կարճ ասեմ. աշխարհս էսպէս է. ուզում ես որ քեզ չը կծեն՝ նախ ինքդ ամենի վրա հաչի. ուզում ես որ անունդ չը սեպեն՝ ռաստ եկողի անունը սեպարու. էտ ամենը ես վաղուց գիտէի... Բայց մէջս մի բան կար, էտ բանի անունը խղճմտանք է, շտէ նա էր իմ էն ամենալատ թշնամիս, նա էր իմ գլխին էս ամեն վատութիւնը բերողը... Ախպէր, մեզ ով է ասել թէ զառը լինենք, որ դայլերը մեզ ուտեն»:

ՀՀ Ազգային գրադարան



NL0408161

12088

ՀԱՍԿԵՐԻ ՀՐԱՏԱՐԱԿՈՒԹՅՈՒՆՆԵՐԸ

1. Հեղ. Մելիք-Հայկազեան. Բաճ օր դեանի տակ 20 կ.
2. Օսկար Ուայլդ, Պրինցն ու ծիծեռնակը . . 20 »
3. Ստ. Լիսիցեան. Քաջ ճամփորդներ. . . 25 »
4. Աթ. Խնկոյեան. Գիւղացին ու արջը . . 25 »
5. Ստ. Լիսիցեան. Քաջ զինուորներ, պիես . . 8 »

Գինն է 20 կոպեկ

Դիմել՝ գրավաճառներին կամ Թիֆլիսի Редакция
"АСКЕРЪ"

891.995

7-29